

Ἡμε μβε ayi Pōl ásamé mbaá echomele bōó Kras né Kōrent

Pōl atamege bōó Jisōs né melō Kōrent

¹ Me Pōl ne meḡme sé Sōstenis ne désamé ἡμε ayina. Esōwō akú me ndere ji akélege nnó me mbe ἡgbá Kras Jisōs.

² Detōme ἡμε ayina eta enyú echomele bōó Jisōs né Kōrent. Enyú ako abi Esōwō akuú nnó débé bōó bíí, apye mé enyú déla bōó ukpea ndere déchome mmye ne Kras Jisōs. Wyembō ntó ne ji apyéé chóncho ne bōó ako abi álú yéndé mbaá ánógé Ata esé Jisōs Kras. Ji alú Ata awese ne awu bwó.

³ Ese dénenemmye nnó Nte sé Esōwō ne Ata Jisōs Kras álérégé enyú galógáló, ne ápye enyú débé ne nesō.

Bōó Kras áwyaá mejeé ndere áchome mmye ne ji

⁴ Ne yéndégébé me nké nnenemmye gétúgé enyú, ntamege Esōwō muú me nnógé néndé alere enyú galógáló wuú ndere dechomé mmye ne Kras Jisōs. ⁵ Elé gétú ji ne Esōwō ajélé enyú né mati mako, apye enyú débó denjáré mejó matimatí ne nnó dékágé ntó depō etií matimati. ⁶ Ewéna eléré nnó abya melóméló Kras ayi Me ngaré enyú akpe enyú mmye wáwálé. ⁷ Ndere elúmbō, enyú déwya mé yéndé echye ewé Mendoó Ukpea echyegé bōó Esōwō ndere débelé amé meti dégilé nnó dége Ata Jisōs Kras sé akéré meso fa mme. ⁸ Esōwō apye nye ntó enyú détené chánchá té kwyakwya, ne muú fō ashúlégé fō enyú ndo né bíí bí Ata sé Jisōs Kras akérege fa mme nnó enyú dépye gyéé. ⁹ Esōwō muú ajógé genó apyéé, elé ji ne akuú enyú nnó décho mbwa ne Maá wuú Jisōs Kras ayi alú Ata esé.

Angya ákpe né echomele bɔ́ Kras

¹⁰ Anmé ba, nnene enyú mmye né mabɔ Ata sé Jisɔs Kras nnó déwamé́gé sé, bége meko ama. Débegé mbɔ, angya abeé fɔ́ né metɔ́ metɔ́ nyú. Bége chónchó ne ate, né uféré nyú ne metɔ́ ema. ¹¹ Njógé mbɔ néndé, bɔ́ fɔ́ né gepúgé Kleo ágaré me nnó enyú déwamege ne ate. ¹² Genó eyigé njógé mbɔ gélú nnó, bɔ́ abifɔ́ ájógé áké ebwɔ́ álú bɔ́ Pɔl, abifɔ́ áké ebwɔ́ álú bɔ́ Apolos, abifɔ́ áké ebwɔ́ álú bɔ́ Sefas, ne abifɔ́ ntó áké ebwɔ́ álú bɔ́ Kras. ¹³ Enyú dékaré Kras malumalu, eló mbɔ? Nnó me Pɔl ne áwɔ́mé né gekwa gétúgé enyú? Wa áwyaá enyú manaá Eɔwɔ́ né mabɔ ma?

¹⁴ Ntamege Eɔwɔ́ nnó, né gelúage enyú yeé muú ayi cha ayi nwyaá ji manaá Eɔwɔ́ apó, ekosé Kripus ebwɔ́ ne Gayɔs. ¹⁵ Ne muú nyú fɔ́ akaagé jɔ́ nnó me nwyaá ji manaá Eɔwɔ́ né mabɔ ma. ¹⁶ (Eh mente, nnó nwyaá ntó Stefanas manaá Eɔwɔ́ ne bɔ́ abi alu né gepú jii, nferé nnó me mma nwyaá sé muú ayichá manaá Eɔwɔ́ wɔ́ ekosé bina) ¹⁷ Jisɔs Kras ató fɔ́ me nnó nchwɔ́ nwyágé bɔ́ manaá Eɔwɔ́ wɔ́, ató lé me nnó nchwɔ́ ngárégé bɔ́ abya melóméló. Nchwɔ́ fɔ́ mankwáné denyaré mejɔ́ né denjá eta ngárége bɔ́ wɔ́. Mbó mpye mbɔ, mbɔ abya melóméló ayi agarege ndere Jisɔs agboó ne gekwa abeé sé ne uto ne me mpyé fɔ́ mbɔ wɔ́.

Kras ne alú uto ne déngáré Eɔwɔ́

¹⁸ Bɔ́ abi ánomé mme detu, áse nnó abya melóméló yina, ayi esé dégárege ndere Jisɔs agboó né gekwa alu genkené́gé genó. Yémbɔ né esé abi Eɔwɔ́ áwénege gemége sé, dékaá nnó alú lé uto Eɔwɔ́. ¹⁹ Genó eyigé njɔ́ mbɔ, mbɔ ne ásamé ntó mmu ηwe Eɔwɔ́ nnó Eɔwɔ́ áké, “Me mpye nye defɔ́ré bɔ́ denjá dénó mme detú, ne mmpye nye ano denyaré mejɔ́ bɔ́ abi ákaá dɔ́ akwé tametame.”

²⁰ Ndere elúmbò, ebée nye nnó ne bọ́ deṅgá? Ebée nye nnó ne abi akaá ḡwe? Ebée nye nnó ne bọ́ abi ákaá denyaré mejó? Mbò ne Eṣòwò apye deṅgá bọ́ mme délá ukeṅkéné unó. ²¹ Eṣòwò ase deṅgá etií, apye nnó ebégé f́ kàkòge mbaá bọ́ mme nnó akaá ji né deṅga etiré bwó. Yémbò, ase abya melóméló ayi esé dégárege, ayi bọ́ áselé nnó alú gekenkenégené genó, áwéné gemége bọ́ abi áfyéé metò ne ji. ²² Bọ́ Jus ákélege mangé lé ufélékpá ne ákame nnó genó eyigé muú ajóge gelu wáwálé. Abi bọ́ Grek ákélege mange lé deṅgá ne ákame nnó genó eyigé déjoge gelu wáwálé. ²³ Esé dégárege lé ndere áwómé né gekwa Muú yi Eṣòwò akweré ji elá gefwa. Abya yina ne apyéé matò anywónenege bọ́ Jus né mmu ne bọ́ abi alá pò bọ́ Jus ásele nnó álú lé gekenkenégené genó. ²⁴ Yémbò bọ́ Jus abifò, ne bọ́ Grek, abi Eṣòwò ákuú nnó ábé bọ́ bií, ákaá nnó Kras alu uto Eṣòwò ne deṅgáre Eṣòwò. ²⁵ Unó Eṣòwò ebi akwaá áferé nnó úlú lé ukeṅkéné unó, déngá délú wye dépwò déngáre bwó. Ne unó Eṣòwò ebi akwaá áselé ntó nnó úlú jò, uwyaa éshye upwò éshye ewé bwó.

²⁶ Aḡmé ba, tége nkane enyú débó délú gébége Eṣòwò ákuú enyú nnó débé bọ́ bií. Né amé gejamégené bọ́, áselé nnó enyú depó f́ ne genó eyigé ebwó ákaá nnó elé deṅgá, gejamégené enyú débó depó anó bọ́, ne gejamégené enyú détané f́ né mala upú kpakpa wó. ²⁷ Yémbò Eṣòwò ajyá bọ́ abi bọ́ mme áferé nnó álú ukeṅkéné bọ́ nnó mekpò unó egbáre bọ́ deṅgá. Ne ajya ntó bọ́ abi bọ́ mme aferé nnó aḡeá geme wó, nnó mekpò unó egbáre anó bọ́. ²⁸ Bọ́ abi alá atané né mala upú kpakpa wó, abi bọ́ mme ábyaa, ebwó abi bọ́ mme áselé nnó aḡeá geme wó, ebwó ne Eṣòwò ajyaa nnó ábé bọ́ bií. Eṣòwò apyembò nnó, atyaa unó bi bọ́ mme aferé nnó uḡeá geme. ²⁹ Ndere elúmbò, yé muú ayi akáge do ebwò ewómé né mbe ushu Eṣòwò nnó, Eṣòwò ajyá me gétúge me nḡea geme ápó. ³⁰ Ngba,

εωόμε mendόο ερό, ελέ Εσωω jimboό ne apye nnό enyú dechό mmye ne Kras Jisωs. Jisωs yina ne alú denjá etiré Εσωω. Ji apye esé delú cho né mbe ushu Εσωω, apye ntό esé delá boό ukpea Εσωω, ne awené gemégé sé né yéndé gabo. ³¹ Ndere elúmbω, dépyé ndere ásamé né mmu ηwe Εσωω, nnό “Muú aké adóo ebωω εωόμε, ádoógé gétúgé genό eyigé Ata Εσωω apye.”

2

Pōl agárege abya ayi Kras agboό né gekwa

¹ Aημέ ba, gébégé me nchwό nyá eta nyú, mangaré mekomejόό Εσωω nkπά fό anόό denya ne denjá eta ne ngárege enyú mekomejόό yimbω wό. ² Ndere mbό nlú ne enyú, njόό né metόό wa nnό, mpye sé genό eyigé cha ekosé mangaré abya Jisωs Kras ne nkane agboό né gekwa. ³ Nchwό eta nyú ne gepwa né mmye, nweré jaja ne εfω metόό. ⁴ Mejόό εwé me njόό, ne unό bi me nleré enyú, uléré fό nnό me nwyáá anόό denya ne denjáré mejόό mampye enyú dékámé ne genό eyigé me njόό wό. Yémbω elé uto Mendόo Ukpea ne upyεé nnό enyú dékaá nnό unό bi me njόό ne ebi nleré úlú wáwálé, ⁵ nnό enyú défyéé metόό ne Εσωω gétúgé uto bií. Me nkélégé fό nnό dénéré metόό né denjáré akwaá.

Mendόo Ukpea epye boό ákaá denjáré Εσωω

⁶ Né egbe ewé denjá etiré délú wáwálé, déselé déti dedóo abya ne boό abi ábené né depōré Εσωω. Dénjá etiré na, dépófó etiré boό mme, yeé ebélé etire afwa mme néndé ela gachyεé gefwagé bwό gebyεé. ⁷ Ne esé degárege mekomejόό ne denjáré Εσωω etiré té nyá muú fω álá akaá wό, néndé Εσωω abό apye nnό muú fω ákágé fω deti. Gémeégé nnό mme yina aló, Εσωω abό abelé mé denjá etiré na, nnό gébégé ake apye genό eyigé gelu ji metόό,

esé débɔ ɲɔ wuú. ⁸ Yé mfwa mme yina ama, ayi akaá denjá etiré na apó. Abó akaá, mbó áwó fɔ Jisɔs Kras, Ata ayi apwáɔ amu né gekwa wó. ⁹ Yémbɔ genó eyigé Ɛsɔwɔ apye gelu wye ndere ásamé né mmu ɲwe Ɛsɔwɔ nnó, “Unó bi yé muú alá lu danɲe, ebi muú alá lu danwú, yé ebi muú ntó alá lu danfere, ubi ne Ɛsɔwɔ akwye ábelé mbaá bɔ́ abi ágboó ne ji.”

¹⁰ Né egbé ewesé, Ɛsɔwɔ apye esé dékaá unó bina, ndere atɔmé Mendoó Ukpea wuú nnó apye esé dékaá ubi. Mendoó Ukpea Ɛsɔwɔ egéne yéndégenó chánchá, yé anɔ unó bi Ɛsɔwɔ alá lú dampye muú fɔ abó mbe akaá. ¹¹ Kágé nnó yé muú ayi ákágé uféré bi úlú muú yichá né metɔ́ apó, ekosé muú yimbɔ jimbɔ́. Wyembɔ ntó ne muú alá kágé ufére ebi úlú Ɛsɔwɔ metɔ́, ekosé Mendoó Ɛsɔwɔ jimbɔ́. ¹² Nana esé bɔ́ Ɛsɔwɔ dékaá nnó achye fɔ sé mendoó bɔ́ mme wó, achye elé esé Mendoó wuú nnó apye esé dékaáge unó bi ji achyege esé.

¹³ Nkaáwú ne dégárege unó bina, délá dégáregé fɔ ne denjáre akwaá. Dégáre lé ndere Mendoó alerége esé, mmye ké déselé uchuú ebi Mendoó alerége dégarege depɔré Ɛsɔwɔ. ¹⁴ Yémbɔ muú ayi alá pó ne Mendoó Ɛsɔwɔ akélegé fɔ mankamé ne unó bi Mendoó Ɛsɔwɔ alérege. Aselé ubi nnó úlú lé ukerjkéné unó eta wuú, néndé elé Mendoó Ɛsɔwɔ ne apye nnó muú ákaá ubi. Ndere elúmbɔ, ji akágé kaá fɔ ubi. ¹⁵ Ne muú ayi Mendoó Ɛsɔwɔ alú ji mmye, acherege depó déko ne akaá yéndégenó. Yémbɔ, ákágé chere fɔ ji, akaá gefɔgé muú ayi ji alu. ¹⁶ Genó eyigé me ɲɔ́ mbɔ gélú wáwálé wye ndere ásamé né mmu ɲwe Ɛsɔwɔ nnó, “Yé muú akágé genó eyigé Ɛsɔwɔ aférege. Yé muú akágé chyéé Ɛsɔwɔ majyéé. Yémbɔ esé abi déwyaá Mendoó Ɛsɔwɔ ne dékágé genó eyigé Kras aférege.”

3

Βῶῶ abi áβενé né depṛé Kras áchwṵ fṵ ne aṅgya

¹ Αἷμέ ba, gébégé nlú ne enyú, ngaré fṵ enyú mekomejṵ ndere βῶῶ abi Mendoṵ Εῶῶ ελί εβῶ né mmye wṵ. Ngaré enyú ndere βῶῶ abi álu ákwṵlege unṵ mme yina ne βῶῶ abi álu ambane né depṛé Kras. ² Me nleré enyú unṵ bi ulá utoṵ, wye ndere muú achyegé ma-máné kṵ némbé alá aságé chyéé ji menyéé metometo. Me nleré fṵ enyú unṵ bi utṵ wṵ, néndé enyú délu dambéne mankaá ubi. Yé nana délu dambéne. ³ Me njṵgé mbṵ, néndé enyú délu pyéε unṵ mme yina ndere matṵ nyú ákélege, demmye demboṵ, déwamege ne ate, ewéna eléré nnṵ enyú délu wye eké βῶῶ mme, délu pyéε wyé unṵ bi εβῶ ápyéé, ⁴ néndé, mbṵgé muú nyú ajṵgé nnṵ, “Me nlú muú Pṵl,” ayifṵ aké, “Me nlú muú Apolos,” enyú depṵ fṵ chá ne βῶῶ mme.

⁵ Gárege me, enyú déferé nnṵ esé ne Apolos délu chá? Esé délu lé βῶῶ utṵ Εῶῶ abi ji ajyaá nnṵ dépye enyú défyéé matṵ ne ji. Yéndémuú sé apyéε utṵ bíi ndere Εῶῶ achyε ji nnṵ ápye. ⁶ Utṵ bina, ulú nnṵ, me mpe mbwé, Apolos agbe manaá wye. Yémbṵ Εῶῶ apye mbwé yimbṵ awené. ⁷ Ndere elúmbṵ, muú ayi apéne mbwé ne ayi agbéle manaá wye, áfu yé genṵ wṵ, Εῶῶ muú apye mbwé yimbṵ áwené ne aṅeá gemε. ⁸ Muú ayi apéne ne ayi agbéle manaá wye álu wye janja. Ne Εῶῶ achyεge yéndémuú nsá ndere ji apyéé utṵ bíi. ⁹ Esé ne Apolos décho amu dépye utṵ Εῶῶ uluá. Ne enyú délu mekwṵ Εῶῶ ewé ese dépye utṵ wyé, enyú délu ntṵ gepú eyigé Εῶῶ aténege.

¹⁰ Né galṵgalṵ ayi Εῶῶ abṵ áléré me, nlṵ mampye utṵ bíi eta nyú. Mpye utṵ ndere mentené gepú melṵmélṵ ayi afyé nébṵmé gepú cháṅéné ne βῶῶ abifṵ álṵṵ manténégé gepú mfaá néni. Ne yéndémuú ayi aténege mfaá nébṵmé

eniné mbɔ, asé gébé. ¹¹ Esɔwɔ abelé mé Jisɔs Kras ndere nébómé eniné mbɔ. Ne yeé nébómé eniné chá eniné muú fɔ amáge fyé nérpó sé. ¹² Bɔ́ abifo, ásele nye unó ulóúló ebi ákuú nnó gul, seleba, ne mataá malómáló, atené gepú né mfaá nébómé eniné mbɔ. Ne abifo ntó ásele nye unó bi ula utoó manchóɔ ndere deweé, mancha ne nchu átene gepú né mfaá nébómé eniné mbɔ. ¹³ Ne bií uma ebi Jisɔs apane nye mpa bɔ́, yéndé gefɔgé utɔ́ ebi muú apyéé ugénege nye gbógónó. Néndé né bií bimbo, Esɔwɔ aselé nye mewɛ, afwɔré utɔ́ ebi yéndémuú apye, mangé nnó úlú ulóúló wa uboubo. ¹⁴ Mbɔgé gepú eyigé muú atené mfaá nébómé gepú eniné mbɔ gélá gésɔ́ wɔ́, mbɔ́ yimbo abɔ́ nye nsá. ¹⁵ Ne mbɔgé gésɔ́ge ebyennó mbɔ́ yimbo atané amu. Yémbɔ jimbɔ́ atané nye né efwyale gabo eké muú ayi áboó atané né mmu gepú eyigé gésóge.

¹⁶ Dékaá fɔ́ nnó enyú délú melú ujwólé Esɔwɔ ne nnó Mendoó Esɔwɔ elú enyú mmye wó? ¹⁷ Ne muú achɔ́gé melú ujwólé Esɔwɔ, Esɔwɔ ntó áchɔ́ geɲwá jíí. Melú ujwólé Esɔwɔ ewémbɔ, elú melu ukpea ne enyú ne délú melú ujwólé ewémbɔ.

¹⁸ Débwólégé gemege nyú. Mbɔgé muú nyú aférégé nnó awyaá deɲgá ndere bɔ́ mme awyaá, nchyegeé ji majyeé nnó ábwólé álá gefɔ́gé muú ayi bɔ́ mme ákuú nnó gekɛɲkénégeé muú, nnó ábɔ́ deɲgáré Esɔwɔ. ¹⁹ Me nɲɔ́ mbɔ néndé, unó bi bɔ́ mme áselé nnó úlú deɲgá, úlú lé ukeɲkéné unó mbaá Esɔwɔ. Elú wyémbɔ néndé ásá né mmu ɲwe Esɔwɔ nnó, “Bɔ́ abifo áférege nnó ebwɔ́ áwyaá deɲgá, yémbɔ Esɔwɔ ápyene ebwɔ́ né deɲgá bwɔ́.” ²⁰ Ne ama asá né mmu ɲwe Esɔwɔ nnó, “Ata akaá nnó uféré ebi muú deɲgá aférege upó yeé genó.” ²¹ Ndere elúmbɔ, ékágé muú nyú ádógé ebwɔ́ ewómé gétúgé genó eyigé ákwaá ápyéé, ajógé nnó me nkwolege ayina, me nkwolegé fɔ́ ayina, kágé nnó yéndégenó gelú mé eyigé nyú. ²² Yé

Ʋol, yé Apolos, yelé Pita, yé mme yina meko, yé gerwá, yé negbo, unó bi úlú mbɔ nana ne ebi uchwɔɔ meso gébé, Eɔwɔ apye nnó unó bina uko, úlú ebi enyú. ²³ Ne enyú ako delu bɔɔ Kras, ne Kras atane mbaá Eɔwɔ.

4

Ʋol ateé bɔɔ Kras né Kōrent ndere gerwáge ηgbá Kras gébɔɔ mambe

¹ Ndere elúmbo, sége nnó esé delu lé baá utɔɔ Kras ne bɔɔ abi Eɔwɔ afyé né amu sé unó bií ebi ubó úlú bíbí nnó dépye bɔɔ ákaá. ² Ne muú ayi áfyéé ji utɔɔ bií né amu, genó eyigé muú apéle mangé eta wuú gélú nnó ápye utɔɔ bií ne metɔɔ wuú mmu ema. ³ Yé ebélé enyú, yé lé bɔɔ abi chá ne ashúlégé me ndo nnó nlu gyéé né utɔɔ eba, ewémbo efú me yé genó wó. Me mbɔɔ ntó nkágé só fɔ mpa yimbo nchye geme ya nnó utɔɔ ba úlú cho. ⁴ Né metɔɔ wa, nferé nnó utɔɔ bi Eɔwɔ achye me, mpyéé ubi chánéné. Yémbo ewéna eléré fɔ nnó me nlú cho wó. Elé Eɔwɔ ne asɔɔ mpa wa. ⁵ Gétú eyigémbo, déwegé fɔ mmye deshúlégé muú ndo nnó ápyé fɔ utɔɔ ebi Eɔwɔ achye ebwɔ chánéné, néndé gébé gélú dankwáne mampa depó etiré na. Gíge bií bi Ata akérege meso fa mme, achwágé apye nye yéndégenó eyigé akwaá ápyéé bíbí gégené gbógónó, apye bɔɔ ákaá uféré ebi úlú ate bɔɔ né matɔɔ. Bií bimbo elé Eɔwɔ ne afege nye yéndémuú ndere apye utɔɔ bií.

⁶ Aηmé ba, né gétúgé enyú nse geme ya ne Apolos nméé ne unó bi me ηjɔɔ mbɔ nnó mpye enyú dékaá ula mekomejɔɔ ayi ji ajɔɔ nnó, “Ékágé enyú délyaá mankwólé majye ami ásame né mmu ηwe Eɔwɔ.” Néndé mbɔgé dékwólégé mami chánéné, déselé fɔ muú fɔ nnó aηeá geme apwɔ ayifo, débwege fɔ mmye nnó nlú muú yina epófɔ ayina. ⁷ Yé muú nyú ayi aηeá geme apwɔɔ nte ayifo apó. Unó uko ebi enyú déwyaá Eɔwɔ ne áchyeé enyú, epó

mbò? Ne mbògé achye enyú unó bina chyége, ulannó muú nyú adóo ebwò ewómé nnó, “M̀b̀òò unó bi né uto bá?”

⁸ Ẁòò òh! Enyú b̀òò K̀orent déferé nnó déwyaá mé unó uko. Dékwé mé gefwa, ne délú afwa ewé esé délá depó. Eeh! Ebé yé nnó enyú délú afwa wáwálé nnó esé ntó débáné enyú dégbáré gefwa chóncho. ⁹ Né metòò wa, nferé nnó Ès̀òwò abelé esé à̀ngbá Kras né melú ewé elá epó ne enógé. Esé délú eké b̀òò abi á̀s̀òò mé mpa nnó áwáne, néndé elú eké á̀kpá esé á̀belé gb̀òhónó né mbaá ayi mme meko chóncho ne makiénné Ès̀òwò ágéne. ¹⁰ Nnó esé délú ukerkéné b̀òò gétúgé délú b̀òò utòò Kras? Yémbò enyú dése gemege nyú nnó dékaá unó uko gétúgé déchomé mmye ne Kras. B̀òò mme á̀selé nnó esé délú j̀òò, yémbò enyú déselé gemege enyú nnó déwyaá eshye. B̀òò ánógé enyú yémbò á̀byaá esé. ¹¹ Kpaá té gébé eyigé na, gébé geko f̀ó ẁó esé dégéne menyé manyé ne manaá manyú ẁó. Défyé lé uchálé mandeé. Gébé eyigé f̀ó, b̀òò áchyegé esé efwyale. Ne gébé geko f̀ó ẁó dégéne malu mambélé ẁó. ¹² Esé depye utòò ne eshye ne dégéne genó eyigé dényéé. Muú ajógé mej̀òò mebo ne esé, dénenémmye nnó Ès̀òwò ájé ji. B̀òò áké achyegé esé efwyale, dékoge wye matòò. ¹³ B̀òò áké áchòò esé mabò, déshugé ebwò meko melóméló. Á̀séle esé nnó délú umpwapwané unó ne ujwaá ebi b̀òò ájyále ne uká.

¹⁴ Nsámé f̀ó unó bina nnó mpye mekpo unòò egbáré enyú, nchyege lé enyú majyéé, néndé delú baá ba ne ngbóo ne enyú d̀òò. ¹⁵ Ne yé enyú débé lé ne gejamégé b̀òò abi ájame enyú né meti Kras, tége nnó déwyaá lé muú ama ayi alú nte nyú. Me muú mpyéé enyú déchome mmye ne Kras ne nlú nte nyú, néndé me ne mb̀òò mbe ngaré enyú abya melóméló Kras. ¹⁶ Gétú eyigémbò nkpeáge enyú nnó dése gekágé neke ena. ¹⁷ Gégé ula bi me ntòme Timòti eta enyú mbò. Ji alú maá wa, ne ngbóo ne ji d̀òò. Ji alu muú ayi

dékage líf mmye ne ji né depǝré Ata Jis̄s. Achwǝgé, atée nye enyú unó bi me mpye ndere menkwǝlé Kras. Unó bina ne nlérege yéndé mbaá né machomele bǝó Kras.

¹⁸ Enyú abifǝ, mmu agbeé enyú néndé déferé nnó me nchwǝ sé ewú. ¹⁹ Yémbǝ Ata akamégé nchwǝ ewú nana. Nchwǝgé nkágé nye mbǝgé utó Esǝwǝ úlú ne bǝó gempǝge bina, wa apyéé lé meno detú. ²⁰ Genó eyigé gélérege nnó Esǝwǝ alú mfwa muú gepǝfǝ denyaré mejǝó élé uto bi Mendoó Ukpea echyégé ji nnó abe ne geɣwá eyigé Esǝwǝ akelege. ²¹ Ndé genó enyú dékélege? Dekwǝrege gepǝgé nyú, nnó me nké nchwǝó eta nyú, nchwǝ pere manleré nnó me mbǝó gejeé ne enyú, waá dékwǝrégé fǝ, me nké nchwǝó, nchwǝ ne maá echyé? Nchyéé enyú efwyale?

5

Ubélé tametame né echomele bǝó Jis̄s

¹ Ubé ǝh, nwú nnó bǝó ábélege ubélé tametame né geluáge nyú. Ágaré me nnó muú nyú ama abelege ne mendée nte wuú. Gebobogé mechó ewé yeé bǝó abi álá pǝ bǝó Jus álá ápyéé fǝ. ² Ne enyú débwege manɣkǝó mfaá bwége né gefǝgé mechó ewé na? Pǝ gefǝgé mechó ewé enyú débǝ mamfyé gepúgé negbo na? Ferege muú ayi apyéé gefǝgé mechó ewéna wáwá né geluáge nyú. ³ Yé élé me nlá mpǝ ewú mbǝ, mendoó wa elú ne enyú, ne nsó mé mpa muú ayi apyéé gefǝgé mechó ewé na nkane mbó mbegé ewú mpyéé, né mabǝ Jis̄s. ⁴ Nkélege nnó enyú dékú echomele déchomége mbaá ama, mendoó wa ebée ne enyú ne uto Ata Jis̄s ntó ubée ne enyú, ⁵ défyéé muú ubé yimbo né amu Danchǝmeló nnó áwa menyammye wuú, nnó Esǝwǝ áféré ji né efwyale gabo né bíí bi Jis̄s Kras akerege meso mansǝ mpa bǝó.

⁶ Mmye mebwege elómé fǝ. Enyú dékaá fǝ nnó nekú némá ne nechǝó ebá, wye ndere ekéké yist gachyéé epyéé

gejamégé flawa amuale wó? ⁷ Débó mamferé muú yimbó ayi apye gabo né geluage nyú. Ji alu eké yist ayi achóó bred. Depyegé mbó debéé nye pópó eké bred ayi alá pó ne yist. Ndere njóoge mbó, nkaá me nnó enyú delú bred meke néndé áwá mé Kras muú alú maá egóhme gepé ayi epaá koó upú. * ⁸ Ndere dényé epaá ewéna, dényé ewú ne bred meke ayi alá apó ne yist. Mmye ké débe ne matóó pópó ne dégarege wáwálé. Dényegé fó ewú ne gekwénege bred ayi awyaá yist. Mmye ké débége fó ne gabo ne nchye ayi esé débó déwyaá.

⁹ Né hwe ayi me mbóó mbe ntómé enyú, ngaré enyú nnó défa mbwa ne bóó abi ábélege ubélé ne bóó tametame.

¹⁰ Me njóoge mbó, ntómé fó ne bóó abi alá kágé Esowó. Ebwó abi ábélege ubélé ne bóó tametame. Abi ásee use, abi ánógé aló uka, ne abi ájóó ejo. Njógé mbó ebyennó nké enyú délyaá mme yina kánká. Yémbó njóó fó mbó wó.

¹¹ Me nsá lé nnó enyú défa mbwa ne yéndémuú nyú ayi aké alú menjmé né echomele bóó Esowó ne ábélege ubélé ne bóó tametame. Yéé ayi asée use, ayi anógé aló uka, ayi alwérege ulwéré, ayi anyuú mmóó akwene yéé ayi alú menjó. Dényégé yéé menyéé ne ufóó bóó bimbó.

¹²⁻¹³ Me mbóó fó mansó mpa bóó abi alá pó bóó Esowó wó. Elé Esowó ne asóó mpa bwó. Bóó abi esé débóó mansó mpa bwó, elé ate ayme abi álu né echomele bóó Jisós. Ndere elúmbó, pyege ndere ásámé né mmu hwe Esowó nnó, “Búge muú ubé yimbó atáné né geluágé nyú.”

* ^{5:7} Elú wáwálé nnó: Né Ijip, Esowó agaré bóó Isreli nnó, yéndé ula gepú áwa maá egóhme áse manoó mií áta manombi nnó ekiénné negbo echwógé ekoó upú bwó koóge. Wye gébé eyigémbó ntó, Esowó ágaré ebwó nnó bred ayi ebwó átyege áfyegé fó yist (uka ebi upyéé bred amualé) nnó ebwó ályá melo Ijip wáwá.

6

Βού Jisws ájyεέ f3 ne ate né eso

¹ Ulannó muú nyú abwé mpa ne nte mehmé, ajyé ne ji né eso, nnó bwó abi alá afyéé metwó ne Jisws wə ne ápa? Ulánnó déla jyef3 né mbaá ate bwó Jisws nnó ákwyé enyú. ² Dékaá f3 nnó bwó Jisws ne ápáne nye mpa bwó mme wó, Ne mbwé enyú ne desw mpa bwó mme, ulannó enyú déla kaágé kwyε ukéké dépw né metwó metwó nyú? ³ Enyú dékaá nnó esé ne dépáne nye mpa makíénné Esww, pó mbw? Mbwé dékaá mbw, εbyennó esé dékágé kwyéε ukéké dépw fa né mme. ⁴ Ndere elúmbw, mechó ekwégé nnó déjye né mbaá bwó abi echomele bwó Jisws ala sé nnó εbwó alú genó wə, nnó asó mpa nyú? ⁵ Me njógé mbw nnó mpyé mmyε εgbó enyú. Nnó yé muú ama apó né geluáge nyú ayi awyaá dennga mankwyéé dépw ne ate ayme nyú? ⁶ Élómé f3 nnó nte mehme abwé mechó ne nte, akpá ji ajyé né eso kpaá te aténégé né mbe ushu bwó abi alá áfyéé metwó ne Jisws wó nnó asó mpa bwó.

⁷ Ndere enyú dékpáne ate déjye né εcha eso, élere nnó enyú dékwe mé dédo uwya mme. Ulánnó muú akelege enyú mpa déla dékógé matwó? Ulánnó muú ányégé enyú upwó déla dékógé matwó? ⁸ Yémbw, nnó enyú délyaá bwó ákélégé enyú mpa, ányégé enyú upwó, dékélégé bwó mpa, dényéé bwó upwó cháchá ne até ayme nyú. ⁹ Kágé nnó bwó ube ányéé f3 gefwage Esww. Ékágé muú ábwólé enyú, elú wáwálé nnó bwó abi ábélege ubele ne bwó támétáme, abi ánógé áló uka, abi ákwene malw, ate andé abi ábélege ne ate, ¹⁰ yé bwó abi ájóó ejó, abi áséε use, abi ányuú mmwó akwéné, abi álwerege úlwéré, ne bwó abi áfage unó bwó. Ufó bwó bina ako ányéé f3 gefwage Esww. ¹¹ Mbó ntó ne enyú abifwó débó délú. Yémbw Esww áshwóné enyú né gabo ayi dépye déla bwó ukpea. Aε enyú nnó delú cho né mbe

ushu wuú. Apyembō, gétúgé utóó bi Ata Jisōs Kras apye ne utóó Mendoó Esōwō.

Se menyammye wye nógé Esōwō

¹² Muú fō ákágé jōó nnó, “Nkágé pyé yéndégenó eyi gejií me.” Wáwálé, yémbō kaá nnó unó ukouko fō wó uchwōó né gelógáló wó. “Nkágé pyé yéndégenó eyi gejií me.” Yémbō nkágé lyaá fō nnó genó gefō geboó me deba, nla eké mefwe mbaá geji. ¹³ Muú ayifō ákágé jōó aké, “Esōwō akwyeé menyé nnó akpene né une ne akwyeé une nnó menyé akpene wye.” Wáwálé, ne kágé nnó bíí uma Esōwō achōó nye une chónchó ne menyéé. Yémbō Esōwō achyéé fō mekwaá menyammye nnó abelege ubele támetáme ne boó wó, achyéé mekwaá menyammye nnó asé menyammye yimbo anógé Ata Jisōs. Ne élé Ata Jisōs ne áchérege menyammye mekwaá. ¹⁴ Ne ndere Esōwō asele uto bíí apye Ata akwíle né negbo, mbó ntó ne ásélé nye utó bíí apye esé dékwile né negbo.

¹⁵ Enyú dékaá chánéné nnó menyammye nyú alú lé upó menyammye Kras. Nnó elómbó, nnó muú asé gepógé menyammye Kras acho ne menyammye mendée eno? Ube! Ékágé be fō mbō. ¹⁶ Enyú débō mankaá nnó mende achogé mmye ne mendée eno, ebwó ne mendée eno yimbo ákwé eké muú ama, wye ndere ásámé né mmu ηwe Esōwō nnó, “Ebwó apeá ákwé eké muú ama.” ¹⁷ Ne muú ayi áchómé mmye ne Ata, ebwó ne ji ábeé metóó ema.

¹⁸ Lyágé mámbélégé ubélé ne boó támetáme. Yéndé gabo chá ayi muú apyeé, áchōó fō menyammye wuú, yémbō muú ayi ábelégé ubelé ne boó támetáme, achōó bō lé menyammye awuú jimboó. ¹⁹ Enyú dékaá fō nnó menyammye nyú álú lé melú ujwólé Mendoó Ukpea wō? Elé Esōwō ne afye enyú Mendoó Ukpea ewéna né mmye. Enyú ambōó fō wó débōó gemége nyú wō. ²⁰ Esōwō ana

enyú ne genó eyigé gejeá geme dǎó mamferé enyú né efwyale. Ndere elúmbǎ, ségé menyammye nyú dénógé Ɛsǎwǎ.

7

Déparé neba

¹ Góge me nshuú enyú meko né dépǎ etiré enyú désamé me.

Elú galógáló nnó mende achogé yé mmye ne mendée. *
² Yémbǎ, té mbaá bǎó ábélege ubelé támetáme dǎó, élóme nnó yéndé mende ábá awuú mendée ne yéndé mendée ntó ábá awuú menǎ. ³ Ne mende abó fǎ manshya mendée wuú ubelé wǎ, ne mendée ntó abó fǎ manshya menǎ wuú ubelé wǎ. ⁴ Menyammye mendée apó fǎ awuú jimbǎó, alú lé ayi menǎ wuú. Ne menyammye mende apó ntó awuú jimbǎó, alú lé ayi mendée wuú. ⁵ Ndere elúmbǎ, ékágé nte ashya nte ubelé, ekosé nnó ebwǎ ákámegé meko amá nnó alyáá kpé ate né mboó gébé nnó anemmye mbaá Ɛsǎwǎ. Ne gébé eyigémbǎ gékógé, ebwǎ abó mankére chónchó nnó ékágé danchǎmeló apye ebwǎ akpé né mmuameno gétúgé alá akágé gbaré mmye bwǎ.

⁶ Me njógé mbǎ, epǎfǎ nnó ηmerege muú fǎ mekpǎ mme nnó abá neba, yémbǎ nchyege lé enyú majyé. ⁷ Metǎó ebǎ egǎó me nnó yéndémuú abe ukwa eké me. Yémbǎ yéndémuú awyáá ewuú echye ewé Ɛsǎwǎ achyéé ji. Achyéé bǎó abifǎ eshye mampye géfógé genó eyigé na, achye abifǎ mampye eyigé na.

⁸ Mbaá bǎó abi alú ukwa, ne akwi andée, ngárege ebwǎ nnó, élómé nnó ebwǎ ábagé fǎ neba, abe ukwa nkane me nlú. ⁹ Yémbǎ, mbógé ebwǎ ákágé gbaré fǎ menyammye

* 7:1 Elú wáwálé nnó: Né gébége Pǎl, bǎó abifǎ né Kōrent áse nnó mamba neba álómé fǎ néndé muú ábagé neba ábǎó fǎ gébé eyigé ákuú ηwe, ne mangigé gejamége unó.

bwó, ábá neba. Néndé elú galógáló nnó ebwó ábá neba ne nnó ájwyegé mmye.

¹⁰ Né mbaá bós abi abané neba, nkpeage ebwó nnó, mendée abagé menɔ, ékágé alyaá menɔ wuú neba. Mejós ewé menjós mbɔ na, epófó me, elé Ata jimboós ne ajós; ¹¹ yémbɔ, mbógé mendée alyagé menɔ wuú neba; ábagé sé menɔ ayicha elá epo mbɔ wɔ, akéré mbaá menɔ wuú ebwó akwyé depó. Ne ékágé menɔ ntó ábú mendée wuú né neba.

¹² Ne mbaá abifɔ abi abané bós abi álá áfyéé metós ne Kras wó, ngárege ebwó nnó yéndé meɲme ayi ábáné mendée ayi álá áfyéé metós ne Kras wɔ, mendée yimbo akámégé nnó ajwólégé ne ji, ékágé alyaá ji neba. Mejós ewé menjós mbɔ, étané membós né metós étané fɔ mbaá Ata wó. ¹³ Wyembɔ ntó, ne meɲme ayi ábáné menɔ ayi álá fyéé metós ne Kras wɔ alá abós fɔ manlyaá ji neba wó, mbógé menɔ yimbo akámégé nnó ajwólégé ne ji. ¹⁴ Me njógé mbɔ néndé, Esɔwɔ ajeé menɔ ayi álá fyéé metós ne Kras wó gétúgé mendée wuú áfyéé metós ne Kras. Ne ajeé ntó mendée ayi alá fyéé metós ne Kras wɔ gétúgé menɔ wuú áfyéé metós ne Kras. Mbógé elá pó mbɔ wó, Esɔwɔ aselé baá bwó eké baá bós abi álá kágé Esɔwɔ. Ne ndere elúmbɔ, Esɔwɔ asé baá bwó ndere bós bií. ¹⁵ Yémbɔ mbógé muú ayi álá fyéé metós ne Kras wó, aké akélege manlyaá neba ne muú ayi áfyéé metós ne Kras, ago ji ajye, néndé ébé epó ewé egbárege muú ayi afyéé metós ne Kras nnó épye nnó alyaá ji neba. Esɔwɔ akú esé nnó débé né nesɔ. ¹⁶ Wɔ mendée menɔ ayi ófyéé metós ne Kras kaá nnó getú jyéé ndófɔ menɔ wye akágé fyéé metós ne Kras. Ne wɔ menɔ ayi ófyéé metós ne Kras kaá ntó nnó getú jyéé, ndófɔ mendée wye akágé fyéé metós ne Kras.

Yéndémuú ábéé wye ndere ji abɔ alu gemegé nnó

Εσωω άkuú ji

¹⁷ Υένδémuú abe wye ndere ji abo alú gébégé Εσωω akuú ji. Gé genó eyigé menlerégé né yéndé echomelé bós Jisws nnó apyegé mbó. ¹⁸ Mbógé asó mé muú nsó ne Εσωω alé ku ji nnó abe muú awuú, ékágé ámuá mambi nnó asó ji nsó. Ne mbógé ntó nnó alú danso wó nsó gébégé Εσωω akuú wó nnó oβε muú awuú ómmýégé fó nnó asó wó nsó. ¹⁹ Yé ásó wó nsó, yé asó wó, ewémbó epye mechó wó. Genó eyigé gejeá gepwós gelú elé nnó ónogé mabe Εσωω. ²⁰ Ndere elúmbó, yéndémuú abe wye ndere ji alú gébégé Εσωω akuú ji. ²¹ Nnó óbó olú memfwé gébégé Εσωω akuú wó nnó oβε muú wuú? Ékágé ochýéé geme jyε efwyale getú eyigémbó. Yémbó, mbógé ógégé meti nnó oferégé geme jyéé nnó óbégé sé memfwé pyembó. ²² Kaágé nnó yé muú abó alú lé memfwé ne Εσωω akuú ji nnó ábé muú wuú, né egβε ewé Ata apó mewé. Elú ntó nnó muú ayi abó alá pó mewé gébégé Εσωω akuú ji nnó abe muú awuú, alú mewé mbaá Kras. ²³ Téggé nnó, Εσωω ana enyú ne genó eyigé gejeá geme mamferé enyú né efwyale. Déβεgé fó afwé mbaá akwaá. ²⁴ Ndere elúmbó, yéndémuú abe wye ne Εσωω ndere ji abó alu, gemεggé nnó Εσωω akuú ji.

Andée abí alá ba ano wó ne akwi

²⁵ Ne gógé menjós dépore bós abi álú ubwene. Genó eyigé me njógé mbó Jisws jimboós fó wó agáre me wó, yémbó ngárégé enyú ndere muú ayi Ata ágéne me meshwe apye me nlú muú ayi enyú dékágé neré metós ne ji.

²⁶ Né úfére ba, elú galógaló nnó yéndémuú ábé wye ndere ji alú néndé efwyale eja nana doó. ²⁷ Muú ayi ábáne mendée ékágé alyaá mendée wuú neba. Ne muú ayi alá alú dambá mendée, ékágé akélé mendée mamba. ²⁸ Yé elé njógé mbó, mbógé muú abagé mendée apye fó gabo wó ne yé mesó mendée abagé menó apye fó gabo wó. Yémbó bós

abi ábane neba, ágṵó efwyale. Ne nkelégé nnó mpye ékágé enyú dékpé né efwyale ewé ebwó ágené.

²⁹ Aṛme ba, góge mengáré enyú nnó gébé eyigé Eṣṵwṵ achyéé elá gachyéé gebye. Né getú eyigémbo, bṵó abi ábáné andée abe eké bṵó abi álá bá andée wó. ³⁰ Bṵó abi áwyaá mesome, ábe eké bṵó abi álá pó ne mesome. Bṵó abi áwyaá nechóchó ábé eké bṵó abi álá pó ne nechóchó. Ne bṵó abi ákene gese ábé eké bṵó abi álá pó ne unó gese. ³¹ Muú ayi awyaá utṵó mampye fa mme abe ndere muú ayi ala nere metṵó ne unó mme wó.

³² Ne nkelégé fṵ nnó genó gechyege enyú efwyale né metṵó. Muú ayi álá bá mendée wó, áfyéé metṵó wuú mampye utṵó Ata Jisṵs, ne akelege nnó apyeé utṵó bimbo gefṵó eyigé metṵó egṵó ji. ³³ Yémbṵ muú ayi ábané mendée anérége metṵó né unó mme, akelégé elé nnó ápye unó bi metṵó egṵó mendée wuú. ³⁴ Ne gétú eyigémbo úféré bíí ukwéné tyátyá. Wyembo ntó ne mendée ayi ábané menṵ anerege metṵó né unó mme gétúgé akelege mampye genó eyigé metṵó egṵó menṵ wuú. Yémbṵ mendée ayi álá lú dambá menṵ, áfyéé lé metṵó mampye utṵó Eṣṵwṵ, ne áchyege geme jíí geko mbaá Ata Jisṵs.

³⁵ Unó bi me njógé mbo na, úlú elé mampoó enyú, epófṵ nnó nshyaá nnó enyú dépyegé fṵ ubi wó, nkelége elé nnó dépyegé unó né meti ewé elu cho, défyé mekpo né depṵré Ata.

³⁶ Muú akpégé gébwenégé mendée mambá, ne agégé nnó gébé eyigé ji alú mambá mendée yimbo gelegé koó, ne ji akágé gbaré fṵ mmye né depṵré ubelé, apye ndere ji akelege abá mendée yimbo. Gabo apṵ mmu. ³⁷ Yémbṵ muú ajógé mé né metṵó wuú nnó ji ábáné fṵ mandée ayi ji abó alú mambá, ne yé genógé fṵ gepó eyi géténé ji nnó abá mendée yimbo, mbógé ji akágé gbaré mmye jíí né depṵré ubelé, ashyagé nnó ábáné fṵ mendée yimbo apye mechó

melóméló. ³⁸ Ndere elúmbó, muú ayi ábáne gembwénégé mendée ayi ji akpené mambá apye mechó melóméló. Ne muú ayi alá bá wə, apye mechó ewé elómé kpaá epwə amu.

³⁹ Mendée abóó fó manlyaaá menə wuú neba, abá menə yicha ewé menə wuú alú membe wə, ekosé nnó menə wuú agbogé ne ji akágé ba menə yicha ndere ji akelégé. Ne menə yimbə abó mambe muú ayi afyee metó ne Kras.

⁴⁰ Ne yé lé menə wuú agbogé ji akágé ba ayicha, né metó wa nferé nnó eló nnó yé menə ayicha ábagé sé. Ne nferé nnó Mendoó Esəwə ne echyegé me majye ami menchyege mbə.

8

Menə genó né gepogé bóó Jisəs elé gejeé epóó defóó

¹ Gógé me njóó depərəé menyee ayi bóó apye ure mbaá aló uka. Yéndemuú ajógé aké, “Esé déwyaá defóó.” Ndere ajógé mbə, abó mankaá nnó defóó dékage pye muú abwəge mmye. Genó eyi gépye bóó áwene né depərəé Esəwə elé gejeé. ² Muú ayi aféré nnó ji akaá me yéndegenó chánchá, alú dankaaá yé genó ndere ji abó alú mankaá. ³ Yémbə muú ayi agboó ne Esəwə ji ne Esəwə akaá ndere muú wuú.

⁴ Ndere elúmbə, déké déjógé mechó manyé menyee ayi apyee ure mbaá aló uka, esé dékaá nnó aló uka, ápó yé genó, ne nnó Esəwə alú lé ama. ⁵ Yé lé unó úlú né mfaánebuú ne fá mme, ebi bóó áséle nnó úlú bó esəwə abi bwó ne yé elé bó Esəwə ne bó ata ájamé dóó, ⁶ esé dékaá nnó Esəwə alú lé ama. Ji alú Nte sé muú akwye unó uko ne akwye esé nnó dénógé ji. Ne déwyaá lé Ata ama ayi alú Jisəs Kras muú unó uko ebi Esəwə akwyeé ukené ne ji. Ne ji ne achyegé esé gerwá.

⁷ Yémbə bóó Jisəs ako fó wó ákaá nnó aló uka apó yé genó wó. Bóó abifo ábó ánógé aló uka kpaá te nnó mbógé ebwó ányégé menyee ayi ápye ure mbaá aló uka, matóó bwó

ágárégé ebwó nnó álú nóge áló uka. Ne élé matóó bwó ala bene wó, agare ebwó nnó apye gye. ⁸ Eṣṣṣó gefógé menyéé ayi esé dényéé ne ápye esé débéé kwókwólé ne Eṣṣṣṣ. Délá dényéé ji wó yé genó gefó eyi genome esé gepó, yé dényéé ji apógé fó esé né meti fó.

⁹ Yémbó, ségé yé gébé nnó ékágé dése ebwonye ewé Eṣṣṣṣṣ aчыe enyú nnó dényéé yéndé gefógé menyéé, dépye aṣṣṣṣe abi álá ábené né depṣṣṣṣé Eṣṣṣṣṣ wó ákpare ákwe. ¹⁰ Néndé muú ayi álá ábené né depṣṣṣṣé Eṣṣṣṣṣ wó, agégé ndere wó ayi ókaá genó, olú né ntoné aló uka onyéé menyéé, ji ntó abóó geji manyé menyéé ayi áчыeé mbaá aló uka. * ¹¹ Ne mbógé anyégé menyéé yimbo ebyennó wó muú ayi ókaá genó ócho geṣṣṣṣwáge meṣṣṣṣe wye ayi álá bené né depṣṣṣṣé Eṣṣṣṣṣ wó, muú Kras agboó ntó getú jíí. ¹² Ópyége nte meṣṣṣṣe wye ayi álá ábené né depṣṣṣṣé Eṣṣṣṣṣ wó, apyéé gabo né genó eyigé metóó wuú egaré ji nnó gélu gyeé, ebyennó ópyé ntó gabo mbaá Kras. ¹³ Ndere élumbó, mbógé menyéé ayi me nyéé akágé pye meṣṣṣṣe wa apye gabo, nyéé sé ji kánká nnó ékágé mpye meṣṣṣṣe wa apye gabo.

9

Unó bi áṣṣṣṣgbá Jisṣṣṣṣ áwyaá ebwonye mampyé

¹ Me nwyáá ebwonye mampye yéndégenó eyigé gelu cho. Me nlú ṣṣṣṣgbá Jisṣṣṣṣ Kras, nkpa amé yá nge Ata sé Jisṣṣṣṣ wáwálé, ne enyú delu utóó bá bi mpyeé ndere Ata aчыeégé me eshye. ² Yé bóó abifó álá ákaá nnó me nlú ṣṣṣṣgbá Kras wó,

* ^{8:10} Elú wáwálé nnó: Né gepṣṣṣṣe bóó Kōrent, melu ewé ájéle nya aló uka élé gekpékpéégé gepú eyi gewyaá gejamégé baá upú. Baá upú abifó élé abi bóó ájwólegé ányéé menyéé ne yéndémuú akage kpe mmu anye menyéé wyeé.

enyú ambóó dékaá wáwálé nnó me nlú ñgbá Jisṣs. Enyú délú gelo eyigé gelere nnó me nlú ñgbá Jisṣs Kras.

³ Gená, ne menshúgé meko mbaá bṣó abi ákelégé manjṣó nnó me mpófó ñgbá Kras. ⁴ Esé dékwané manse menyé ayi dényé mbaá bṣó né utṣó ebí esé dépye. ⁵ Nnó esé dékwané fṣ mamba andée dékene ne ebwṣ ndere Pita ne áñgbá Jisṣs abifṣ, ne aṣme Ata Jisṣs ápye wṣ? ⁶ Waá nnó wylé esé ne Banabas ne débṣó mampye utṣó ne amu sé gené dégé menyéé ayi dényéé? ⁷ Ndé muú be, ayi apye utṣó, anyéé né mmu gebagé nkú jíí? Muú ayi apene genṣó eyi géwṣme umpome abó manyé umpomé bi genṣó eyigémbṣo géwṣme, wa mbṣo fṣ wṣ? Ne muú ayi ábáme mpṣ, abó manyú nebene mpṣ wa mbṣo fṣ wṣ?

⁸ Enyú déférégé fṣ nnó unó bí menjṣó mbṣo, utané lé né metṣó mekwaá. Mabé ayi Esṣwṣ achye Mosis agárege wye mbṣntó. ⁹ Mabe ayi Esṣwṣ achyéé Mosis aké, “Muú áwégé fṣ meno mpṣ ayi apyéé utṣó né mekṣó gébégé aké apyéé utṣó né mmu mekṣó.” Ékágé esé déféré nnó Esṣwṣ abó ajṣó mbṣo atóo lé ne mpṣ ejieji. ¹⁰ Nnó genó eyigé Esṣwṣ ajṣó mbṣo getoó ne esé wṣ? Getoó ne esé wáwálé néndé muú ayi apené mbwé né mekṣó ne ayi aferege mbwé ebwṣ ako ánerégé matṣó nnó mbṣó mekṣó achyege nye awuú bwṣ mbwé. ¹¹ Esé depé depṣré Esṣwṣ né matṣó nyú wye eké mbwé ayi muú apené né mekṣó, nnó elú mechṣo mebo ndere enyú dépṣge esé ne unó bi menyammye sé ákelegé? ¹² Mbógé enyú déchyege unó mbaá ate bṣó abifṣ bṣó abi áwyaá ntó ebwṣnye mansé ubi, nnó esé ntó dékwané fṣ mansé unó eta nyú ebi ujamé upwṣó yé ebi bwṣ wṣ?

Yémbṣo, esé défyé fṣ eshye mangíí enyú ubi, yé lé délú cho mangíí. Esé dégígé fṣ unó bina dékógé lé metṣó nnó ékágé dépye genó eyi gégbéé nnó bṣó awúgé fṣ abya Kras. ¹³ Enyú dékaá wáwálé nnó bṣó abi ápye utṣó né mmu echa upé Esṣwṣ, áwú bwṣ menyéé átánégé lé eféé.

Ne ampye upe abi apye upe né geluógé upeé Esōwō, awú bwó menyéé ntó átanégé né menyéé upe ayi bōó áchyegé. ¹⁴ Wyembō ntó ne Kras Jisōs agaré nnó bōó abi ágáregé abya melóméló, awú bwó menyéé abō mantanege lé né mbaá bōó abi áwuú abya melóméló.

¹⁵ Yémbō, nlú dansε ebwōnye ewena mpyéé unó bi úlú cho mampye. Yé élé nsame mbō, nsamé fō nnó enyú déchye me ubi. Elú galógáló nnó me nkpe ngbo lé mbya ayi ngarege abya melóméló nla nselé fō genó. ¹⁶ Me nke ngáregé abya melóméló ewémbō epyéé fō nnó me ndogé ebwó ewōme, néndé élé utóó bá ebi me mbōó mámpye. Ne mbógé nla ngaré abya melóméló yina wó, ebōó nyε ne me. ¹⁷ Ebe nnó me mbōó ne mbō njyaá gεme ya nnó ngarege bōó abya melóméló, me mbō nkelege nsa. Yémbō me mbōó fō wó njyaá gεme ya wó, élé Esōwō ne ajyaá me ne áfyéé me utóó bíí né amu nnó mpyégé. ¹⁸ Ne nsá wa alú nnó, né utóó bina? Ekosé metóó megómégó ewé menwyaá gétúgé ngarege bōó abya melóméló detú. Ngáregé bōó abya melóméló ngíge fō nnó achyéé me genó ndere muú ayi agarégé abya melóméló ábōó mangií.

¹⁹ Me mpó yé mefwé mbaá muú fō, yémbō nse gεme ya nkane mefwε mbaá bōó ako nnó mpyε gejamégé bōó áfyε matóó ne Kras. ²⁰ Me njyégé mbaá ayi bōó Jus alú, nkwe eké muú Jus nnó mpyε ebwó áfyε metóó ne Kras. Ne njyégé ntó né mbaá ayi bōó abi ákwōlege mabe Mosis alú, nkwe eké muú ayi ákwōlege mabe Mosis nnó mpyε ebwó áfyε metóó ne Kras, yé élé me nlá pó fō muú ayi ákwólégé mabe Mosis. ²¹ Njyégé mbaá bōó abi álá kágé mabe Mosis, nkwe eké muú bwó nnó mpyε ebwó áfyéé metóó ne Kras. Ne yé élé nlá nkwólégé mabe Mosis epófó nnó nkwólégé fō mabe Esōwō, nkwólé, néndé nkwólégé mabe Kras. ²² Njyégé mbaá bōó abi álá lú dambene né dépōré Esōwō, nkwe eké muú bwó nnó mpyε ebwó ábené né depōré Esōwō. Me

mbwólége yéndé gefógé muú né mati mako nnó ebegé kókógé mmye mpye yé abifó áfyé metṓṓ ne Kras.

²³ Memyeé unó bina uko nnó abya melóméló ajyegé mbe nnó meso gébé me ntó mbṓ mejeé ewé abya melóméló achwṓṓ ne ewú mbaá bṓṓ abi áfyéé matṓṓ ne ji. ²⁴ Enyú dékaá nnó mankwólé Eṣṓwṓ alú eké metú gátélé. Bṓṓ abi ákpene wye ako álómege, yémbṓ, elé muú ama ne abṓṓ nsa. Gétú eyigémbṓ, kwólégé Eṣṓwṓ chánéné nnó meso gébé débṓ nsa wye nkane muú ayi álómege gátélé abṓṓ nsa. ²⁵ Yéndémuú ayi ákpene né metu gátélé, aselé gébé, akpomé mmye né mati mako. Apye mbṓ nnó abṓ nsa, ne nsa yimbṓ alú ayi áchṓge. Yémbṓ nsa ayi esé bṓṓ Eṣṓwṓ débṓṓ nye alú lé nsa ayi álá chégé fṓ te kwyakwya. ²⁶ Gétú eyigémbṓ, ne me nlá nlómégé fṓ eké muú ayi álá pṓ ne genó eyigé anerégé metṓṓ wye mambṓ. Me mmye fṓ eké muú ayi amyéé umyéé adoo ukwekwe né mme detú. ²⁷ Mpye menyammye wa awuú ubalé nnó áwúgé ne me. Mpyeé mbṓ nnó ékágé me ngarége bṓṓ mekomejṓṓ Eṣṓwṓ ebwṓ ábṓ nsa, membṓṓ nnó detu.

10

Pol akwelé mbeé mbaá bṓṓ Kōrent nnó ékágé ápye genó eyigé bṓṓ Isrelí ápye nya ágene efwyale

¹ Aṣme ba, nkelege nnó enyú détége genó eyi gépye nya ne ukwene ante sé gébége ebwṓ ákené ne Mosis né mashwóné. Ndere ebwṓ akene ájyéé geko gebame ebwṓ ako ne ebwṓ ako áchyaá ebéé mega megélé né mme. ² Ndere gekó gébamé ebwṓ, ne mánchyaá ayi ebwṓ áchyaá ebéé mega ewémbṓ, elúmbṓ lé manaá Eṣṓwṓ ne ebwṓ áwṓṓ. Ne gefógé manaá ami ebwṓ áwṓṓ mbṓ, mánléré nnó ebwṓ álu áṣkwólé Mosis. ³ Ebwṓ ako ányé gefógé menyéé ama ayi Eṣṓwṓ achyéé ebwṓ. ⁴ Ne ebwṓ áko ányú ntó manaá ami Eṣṓwṓ achyéé ebwṓ. Manaá mimbṓ matanege

né etaravé ewé ekene ne ebwó, ne etaravé ewémbo ebó elu lé Kras. * ⁵ Yé elé Eṣowó álere ebwó galógáló mbo, gejamégé ebwó ápye unó bi metóó enywónene Eṣowó. Gétú eyigémbo, Eṣowó awá ebwó, ne uḡkwó bwó úlá né mashwóné tyátyá.

⁶ Unó bi upyé mbo na, úlú elé manchyeé esé majyeé nnó ékágé esé débógé gejeé mampyege gabo ndere ukwene ante sé ábó ápyeé. ⁷ Dénógé f́ aló uka ndere ebwó abifó ábó ápyeé. Ásá né mmu ḡwe Eṣowó nnó, “Ebwó ájwólé, ányeé, ányuú ne ákwilé mme áló mámbéné mabée né mbe ushu meló uka.” ⁸ Ékágé esé ntó débélégé ubélé ne b́ó tamétamé ndere ebwó abifó ábó ápyeé. Gétúgé eyigémbo, Eṣowó apyé delé b́ó esaá meso eléé ágbo né bií uma. ⁹ Ékágé dékpélé Kras ndere ebwó abifó ábó ákpélé ji, gétú eyigémbo Eṣowó ató mmyó enó ebwó ágbo. ¹⁰ Ne déḡmenégé f́ Eṣowó meso humm hummm ndere ebwó abifó ábó ápyeé ne ekiénné Eṣowó ewé ewáné b́ó echwó wá ebwó.

¹¹ Unó bina uko ebi upye nyá ne ebwó úlú lé mánkwélé b́ó mbée nnó ase gébé. Ne ásá ubi né mme nnó achyeé esé majyeé, esé abi délú mbo né gébé eyigé na, eyi elá gachyeé mme abyé.

¹² Ndere elúmbó, yéndémuú ayi aféré nnó aténé chánéné, ase gébé nnó ékágé akwé gébégé mmuámeno áchwógé eta wuú. ¹³ Kaágé nnó, yé mmuameno ayi achwóó eta nyú ayi álá lú gachwó mbaá ate b́ó ápó. Eṣowó alu muú ayi dékage líí mmye ne ji. Délííge mmye ne ji alyaágé f́ nnó enyú dékpe né mmuámeno ayi apwóó eshyeé nyú. Yémbo, mmuámeno achwógé eta nyú, Eṣowó

* ^{10:4} Elú wáwálé nnó: Etáravé ewé ebó ekene nya ne b́ó Jus, elé Kras Jimbo ne ákene ne ebwó.

achyegé enyú eshye ewé dékoge metṓṓ dépwṓṓ mmuá-meno yimbṓ.

¹⁴ Aḡme ba, ndere elúmbṓ, boóge délya aló uka manógé.

¹⁵ Enyú delú bṓṓ abi dékágé genó, férege, dégené nno, mechó ewé me njṓṓ mbṓ elú wáwálé. ¹⁶ Esé déké déteé negbóné Kras chónchó, détamégé Esṓwṓ né mmṓṓ ami. Ndere dépyeé mbṓ, déchome mmye, dékarege amo manoó Kras. Ne déké denyeé ntó bred ayi agyálé ubauba délerege nnó déchomé mbṓntó mmye, dékarege menyammye Kras. ¹⁷ Yé elé esé abi denyeé ntó bred yimbṓ déjamé, ntó bred yimbṓ alú lé ama. Ewéna eléré nnó esé ako décho mmye déla muú ama.

¹⁸ Tégé gepṓgé bṓṓ Israeli, ebwṓ abi ányeé menyéé ure ayi ápye ure né mfaá geluógé ure, áchónege mmye ne Esṓwṓ muú ebwṓ ánógé. ¹⁹ Ndé genó me njṓgé mbṓ fa? Nnó me njṓgé mbṓ lé nnó aló uka álú genó? Waá menyé ayi ápyeé ure mbaá aló uka ne álú genó? ²⁰ Ngba, me njṓgé fṓ mbṓ, njṓgé lé nnó ure ebií bṓṓ abi álá pṓ bṓṓ Jus ápyeé mbaá aló uka, ápyeé mbṓ lé mbaá aló nchye apyeé fṓ mbaá Esṓwṓ. Ne me nkelégé fṓ nnó enyú déchome mmye ne aló nchye. ²¹ Muú ákágé nyú fṓ mmṓṓ né amo Ata, ne ama anyúgé ntó mmṓṓ né amo aló nchye. Muú ákágé nyé fṓ ntó menyéé Ata ne gébé gema anyégé menyéé aló nchye. ²² Ékágé esé dépye genó eyigé Esṓwṓ ammye deboó. Nnó esé déwyaá eshye dépwṓ ji?

²³ Muú fṓ ákágé jṓgé aké, “Me nkáge pye yéndégenó eyi gejigé me metṓṓ.” Elú wáwálé, yémbṓ, kaágé nnó, unó uko fṓ wṓ upoógé wṓṓ. “Me nkáge pye yéndégenó eyi gejige me metṓṓ.” Yémbṓ kaá nnó unó uko fṓ wṓ upye muú awené wṓ. ²⁴ Yéndémuú afrégé mampye genó eyi gepógé ate aḡme, epófó eyi gepógé jimbií wṓ.

²⁵ Nyégé yéndé menya ayi akpoó né gese. Dégigé fṓ mbaá ayi menya yimbṓ atané. ²⁶ Néndé ásá né ḡwe Esṓwṓ

nnó, “Εσωω ne abó mme ne yéndégenó eyi gelú né mme.”

²⁷ Mbógé muú ayi álá afyεé metó ne Kras wó, akúgέ enyú menyεé déjyεgέ, nyégé yéndégenó eyigé ji achyεgέ enyú. Dégigé fó mbaá ayi menya yimbo atané nnó ékágé mató nyú áchyε enyú εfwyale. ²⁸ Yémbó muú agárégé enyú nnó, “Menyεé yina elé ayi apyεé upε mbaá aló uka”, dényégé fó ji, nnó ékágé muú fó abó εfwyale né metó ásé nnó enyú dépyε gabo. ²⁹ Me njógé mbó, épófó nnó nké enyú délyaá menyεé yimbo gétúgέ dényégé débó εfwyale né metó. Njógé lé nnó delyaá manyé menyεé yimbo gétúgέ dényégé muú yimbo abó εfwyale né metó wuú. “Ulánnó me nlyáge genó eyigé me mbó manyé gétúgέ muú ayifó aferé nnó, ‘Muú anyεgέ alú gyεé’. ³⁰ Mbógé me nchyεge matame mbaá Εσωω gétúgέ menyé ayi me nyεé, ulánnó muú áchó me mabó gétúgέ menyεé ayi mbó me mbe ntamé Εσωω ne me nlé nyé?”

³¹ Yémbó kaá nnó yéndégenó eyigé wó apyεé, yé wó onyεé, yé onyuú obó mampyε geji ndere gepyεé bó áfégé Εσωω. ³² Σε gébé nnó ékágé apyε genó eyi gepyεé bó apyεé gabo, yé bó Jus, yé bó Grek, yé εchomele bó Εσωω. ³³ Wyεmbó ne me mmyεé nnó mpyεé metó εgógé yéndémuú né yéndégenó eyigé me mpyε. Me nkelégé fó mampyε genó eyi gepogé lé me mbií. Me mpyε eyi gepogé bó ndere Εσωω akágé feré εbwó né εfwyale gabo.

11

¹ Ndere élumbó, kwólégé ntó gekágé neke ya wyε ndere me nkwólége eyige Kras.

Gefó eyigé andée ábó mambe né εchomele bó Kras

² Me nfége enyú néndé déteé me né yéndégenó ne dépyε unó wyεé ndere me mbó nleré enyú. ³ Yémbó nkelégé mampyε enyú dékaá chánéné nnó Kras ne alú

mekpo mbaá ande ako, mende ne alú mekpo mbaá mendée. Ne Εσωω alu ndere mekpo mbaá Kras. ⁴ Υéndé mende aké anenémmye né echomele βός Kras, yé aké agarege mekomejós ayi atane mbaá Mendoó Εσωω, akweregé mekpo wuú ebyennó achyegé mbə lé mekpo unós mbaá muú kpaá wuú. ⁵ Ne yéndé mendée aké anenemmye, yé aké agarege mekomejós ayi atane mbaá Εσωω álá akwere mekpo wuú wó, achyegé mbə elé mekpo unós mbaá muú ayi alu ndere mekpo wuú. Alú wye eké akpalé ji mekpo. ⁶ Ndere elúmbə, mbəgé mendée akelégé fə mankwere mekpo wuú, ákpe ákpale mekpo wuú. Yémbə, mbəgé ji akaá nnó elú elé mekpo unós eta wuú mankpale mekpo akwerege mekpo wuú. ⁷ Ne mende abó fə mankwere mekpo gébégé aké anenemmye wó. Néndé Εσωω akwyéé mende nnó ábé eké jimβós, achyegé Ji ηγω. Yémbə mendée afyéé lé mende ηγω mmye. ⁸ Néndé Εσωω ase fə membea mendée ne akwyéé mende wó, asé lé ayi mende ne akwyéé mendée. ⁹ Elú wye ndere Εσωω álá akwyéé fə mende gétúgé mendée wó. Akwyéé mendée gétúgé mende. ¹⁰ Gegé ula bi mendée abós mankweré mekpo wuú, manlerege nnó mende ne abós uto né eta wuú. Apyegembə matós asós fə makiénné Εσωω. ¹¹ Yé ndere elúmbə, esé abi défyéé matós ne Kras, mendée abó fə mantene ushu ushu bíí wó. Abó mantene ne mende. Ne mende ntó abós fə mante ushu ushu bíí wó. Abó mantene ne mendée. ¹² Yé lé asle membea mende ne akwyéé mendée, yé mende fə, apó fa mme ayi mendée álá byéé ji wó. Ne elé Εσωω ne akwyéé unó uko.

¹³ Enyú amβós déferege dégené nnó elómé fə nnó mendée anenemmye eta Εσωω ewé álá we gebugendéé né mekpo wó. Elómbə? ¹⁴ Né mme yina, dége mbə nnó mende abege ne mejwe metyemetye, achyege mbə lé mekpo unós né geme jíí, ¹⁵ ne nnó mendée abege ne

mejwe metyemetye, efyε ji ulóó né mmye. Néndé Eσωω achye mendée mejwe ewémba nnó eβε ndere genó eyi gekwerege ji mekpo. ¹⁶ Ne mbogé muú fó aké aklege manyeé mbeé né mecho ewe, mengarege ji nnó esé aṅgba Kras depó sé ne gepo eyigé cha manleré ndere anogé Eσωω yé machomele bóó Kras apó ne geji.

Bóó echomele Kras né Kōrent ányeé menyéé Ata né meti ewé elápó cho

¹⁷ Né mecho ewé me nchwáó ngaré enyú, nfege fó enyú, néndé enyú dechwogé chónchó ndere bóó Jisós, déchwó fó né galógáló, déchwáó manchó depó choó. ¹⁸ Ne genóge mbe gélú nnó, agaré me nnó enyú déchwogé chónchó né echomele nyú manogé Ata, déjwolege matoó matoó ne aṅgya. Ékágé be wáwálé. ¹⁹ Aṅgya ábó mambe metóó metóó nyú. Abegé mbá, ákágé nyε muú ayi akwolege Jisós wáwálé. ²⁰ Menge mbá nnó gébége enyú déchwogé chónchó nnó dényeé menyéé Ata, yémba ji fó wó enyú déchwáó manyeé wó. ²¹ Genó eyigé enyú dépyeé gelu nnó, yéndemuú awenege manye menyéé awuú, atéé fó ate aṅme abifó. Ndere dépyembá, abifó anyeé, anyuú akwene, abifó agboó mesa. ²² Chaá! Nnó enyú depó ne upú ebi enyú dékágé nyεge menyéé, dényuú mmáó wyéé? Ne ulánnó enyú débyaá echomele bóó Eσωω, déchyεge mekpo unáó mbaá abi alá pó ne genó. Enyú dékelege nnó me mpyeé nnó ne enyú? Dékelege memfeé enyú né gefógé mecho ewé? Ngba, nkágé pye fó mbá.

Menyéé Ata Jisós

(Mat 26:26-30; Mak 14:22-26; Luk 22:14-20)

²³ Unó bi Ata alere me, ubi ne menlere enyú, nnó né utuú bi achyeé Ata Jisós maṅkwaá, abó ntó bred, ²⁴ áchyεgé matame mbaá Eσωω, agyá ntó bred yimbá ubauba, ajóó aké, “Gége menyammye wa na, me nchyége né gétúgé

enyú yéndégébé déké dényε ji, pyégé wyé na mantégé negbo na.” ²⁵ Wyémbɔ ntó ne gébégé anere menyéé manyε, abó amo ne mmɔ́ mmu ajɔ́ aké, “Amo yina alú gepó eyi gelere menomenyεé meke ewé Ɛsɔwɔ anyεé ne enyú. Menomenyεé ewéna eké ne manoó ama. Ne yéndégébé déké dényúú mami, pyégé wyémbɔ mantégé negbo na.” ²⁶ Ne yéndégébé enyú déké dényεé bred yina, dényúú mmɔ́ ami malú né mmu amo yina, dégarege mbɔ lé negbone Ata kpaá te ji achwó.

²⁷ Né gétú eyigé na, yéndémuú ayi anyεé bred yina, anyúú mmɔ́ ami na né meti ewé elá echyεge enógé mbaá Ata, akwe mpa né metɔ́ wuú néndé ábyaá mbɔ lé menyammyε ne manoó Ata. ²⁸ Ndere elúmbɔ yéndémuú abó mbe áchéré metɔ́ wuú, ne anyεé bred, anyúú mmɔ́ ami malu né mmu amo. ²⁹ Néndé muú ayi anyεé bred yina, anyúú mmɔ́ mina álá kágé, fere nnó unó bina utené né menyammyε Ata, akεlege mbɔ lé efwyale né geme jíí. ³⁰ Gé ulá bí gejamégé bɔ́ né metɔ́ metɔ́ nyú amεé, abifo áwyaá gepwa ne abifo ntó agboó. ³¹ Yémbɔ ɛsé débɔgé mbe décherege matɔ́ se chánéné, Ata achyεge f́ ɛsé efwyale. ³² Ɛsɔwɔ acherege depɔ etiré sé, agεge nnó délu gyéé, apyεé menyammyε sé awuú ubale nnó né bíí bi ji asɔ́ mpa, achyεge f́ ɛsé efwyale chónchó ne bɔ́ abifo.

³³ Né gétú eyigémbɔ, aηme ba, yéndégébé déchwágé chónchó manyε menyéé Ata, debó mangile ate. ³⁴ Mbɔgé mesa aké ammyε muú, abɔ mbe anyεé menyéé né gepú jíí, nnó gébégé enyú dechwágé chónchó ékágé dépyε genó eyigé Ɛsɔwɔ achyεgé enyú efwyale. Ne depɔ etiré délaá, membɔ́ nchwágé ngarege nyε enyú.

12

Ɛchyε ewé Mendoó Ukpea echyεge

¹ Αημε βα, nana nkelege mampye enyú dékaá cháηéné deporé unó bi Mendoó Ukpea echyεge bós uto nnó ápyεgé.

² Enyú dékaá nnó gébégé enyú dela delú danfyε matós ne Jisós, anyua enyú denó mewaá, dela nógé lé aló uka, unó bi ula ujógé mejós. ³ Ndere elúmba, nkelege mampye enyú dékaá nnó yéndémuú ayi Mendoó Εσωω elú ne ji ajógé fós nnó, “Jisós obós wyεé.” Ne ye muú fós ntó ákágé jós fós nnó, “Jisós ne alú Ata”, mbogé Mendoó Ukpea elá epó ne ji.

⁴ Kaágé ntó nnó unó bi Mendoó Ukpea echyεge bós uto nnó ápyεge úlú ufós ufós. Yémba wyε lé Mendoó Ukpea ewú ema ne echyεge εbwó uto mampye unó bina uko.

⁵ Matós ami esé dépyεé mbaá Ata malu ufós ufós, yémba wyε lé Ata wu ama ne esé ako dépyεé utós bií. ⁶ Mati ayi esé dépyεe utós mbaá Εσωω álú ufós ufós yémba wyε lé Εσωω wu ama ne apyε utós né γεηwáγε yéndémuú sé.

⁷ Mendoó Ukpea echyεge uto mbaá yéndémuú sé nnó déσε ubi dépyεge utós ebi upogé bós ako. ⁸ Mendoó Ukpea echyεge muú ayifó uto manjós mejós Εσωω ne denγα.

Muú ayifó echyεge ji uto manlere unó bi Εσωω apyε ji akaá. Wyε lé Mendoó Ukpea ewú ema ne echyεge εbwó utó mampye utós bina. ⁹ Mendoó Ukpea wú ema, echyεge muú ayifó utó mamfyε metós ne Εσωω kraá te ápyεé genó eyigé ji ágige. Muú ayifó echyεge ji utó mampye bós abi ameé ufós ufós mameé átoógé. ¹⁰ Mendoó Ukpea echyεge muú ayifó utó mampye ufélekpa, muú ayifó echyεge ji utó mangarege genó eyigé getané mbaá Mendoó Εσωω.

Ayifó echyεge ji utó mankaá unó bi utanege mbaá Mendoó Εσωω ne ebi ulá utanege fós mbaá Mendoó Εσωω. Ayifó echyεge ji utó manjós ufós mejós ebi yé jimboós álá kágé fós. Ne ayifó ntó echyεge utó mangare ulaá ufós mejós ebimbo.

¹¹ Unó bina uko elé wyε Mendoó Ukpea wú ema ne echyεge esé utó nnó depyεge ubi. Ne echyεge yéndémuú ebií utó cha ndere ewú ekélege.

Aḡkwōle Jisōs álú eké upō menyammye uchaucha né menyammye ama

¹² Dékaá nnó menyammye mekwaá awyaá upō uchaucha. Ne yé elé upō menyammye ujame dṑó, ucho upye lé menyammye ama. Mbṑntó ne Kras álú. ¹³ Esé abifṑ délú bṑó Jus, abifṑ bṑó Grek. Bṑó abifṑ álú áfwe abifṑ ápó. Yémbṑ gébégé awyaá esé manaá né utó Mendoó Ukrepa ewémbṑ ema, esé ako dékwe eké menyammye ama ne Esṑwṑ apye esé ako dése Mendoó ema.

¹⁴ Ne dépege menyammye mekwaá apó fṑ lé ne gepṑge menyammye gema, awyaá upō gejame. ¹⁵ Dése nnó geke geke, “Me mpó fṑ gepṑge menyammye néndé me mpó fṑ ebwṑ” ewémbṑ epye fṑ nnó geji gebeye fṑ gepṑge menyammye, waá epyeé? ¹⁶ Ne mbṑgé etu eké, “Me mpó fṑ gepṑge menyammye néndé me mpṑ fṑ dambṑnyi, ewémbṑ epye fṑ nnó ewu ebeye gepṑgé menyammye, waá epyeé?” ¹⁷ Ne mbṑgé menyammye meko abe lé dambṑnyi jiji, mekwaá abṑ awuú mbṑ mbaá ne ndé? Ne mbṑgé menyammye meko ntó abe elé etu ewu ewu mekwaá abṑ awuú mbṑ, gebeye ne ndé? ¹⁸ Ndere elúmbṑ, Esṑwṑ akwyéé menyammye mekwaá né upṑupṑ, ne abelé yéndé gepṑ ndere ji akelege. ¹⁹ Ne mbṑgé upṑ bina uko ubṑ ube lé gepṑ gema, menyammye abṑ abeé fṑ. ²⁰ Ndere elúmbṑ, menyammye mekwaá awyaá upō gejame, yélé upṑ ujame menyammye álú elé ama.

²¹ Gétú eyigémbṑ dambṑnyi ákágé jṑó fṑ ne ebwṑ nnó, “Ṑkágé pṑó fṑ me.” Yé mekpṑ ékágé jṑó fṑ ne uka nnó “Ṑkágé pṑó fṑ me.” ²² Yémbṑ wáwálé álu nnó, upṑ menyammye ebifṑ ebi esé déferé nnó upṑ ne eshyeé dékágé jwṑlé fṑ ewé ubi ula pṑ. ²³ Ne upṑ menyammye ebi esé désele nnó upṑ ne énégé, ubi ne esé dénógé dṑó. Ne ebi esé déla kelé nnó ubi ube fuú ne esé dékwerege chánéné, ²⁴ ewé déla dépye fṑ mbṑ, ne upṑ ebi ulṑme dṑó.

Yémbw̄ Es̄w̄w̄ achoné up̄w̄ menyammye bina mbaá ama, ne achyέé é́nógé mbaá ebi ula up̄w̄ ne é́nógé, ²⁵ nnó up̄w̄ menyammye ubegé f̄ó ne angya, ucherege lé ate. ²⁶ Mb̄w̄gé gep̄w̄gé menyammye gema geké gegene efwyale, ebif̄o uko ntó ugene efwyale chónchó ne geji. Mb̄w̄gé gep̄w̄ gema gebeḡe ne é́nógé ebif̄o uko ntó ubéé ne nechóchó chónchó ne geji.

²⁷ Wyembw̄ ntó ne menyammye Kras álú. Ne yéndémuú nyú alú gep̄w̄ge menyammye wuú. ²⁸ Ne Es̄w̄w̄ achyέé yéndémuú gef̄ógé ut̄w̄ó bií né echomele b̄w̄ó Kras. Ntoó eníné mbe elé áhgbá Jis̄s, matoó apea elé b̄w̄ó ekpáv̄é Es̄w̄w̄, matoó uléé elé, anlere mekomej̄w̄ó Es̄w̄w̄. Ne abi akw̄lege elé b̄w̄ó abi apyέé ufelekpa, abi apyέé b̄w̄ó mameé atoógé, abi apogé b̄w̄ó, abi ápele ndere ut̄w̄ó Es̄w̄w̄ ukene, ne abi aj̄ógé uf̄w̄ó mej̄w̄ó uf̄w̄ó ebi ebw̄ó ambw̄ó alá kágé. ²⁹ Nnó b̄w̄ó ako ne álú áhgbá Kras? Ngba! Nnó b̄w̄ó ako ne álú b̄w̄ó ekpave Es̄w̄w̄? Ngba! Nnó b̄w̄ó ako ne álú anlere mekomej̄w̄ó Es̄w̄w̄? Ngba! Nnó b̄w̄ó ako ne ápyέé ufelekpa? Ngba! ³⁰ Nnó b̄w̄ó ako ne ápyέé b̄w̄ó mameé atoógé? Ngba! Nnó b̄w̄ó ako ne áj̄ógé uf̄w̄ó mej̄w̄ó uf̄w̄ó uf̄w̄ó? Ngba! Waá nnó b̄w̄ó ako ne ágarege ula uf̄w̄ó mej̄w̄ó bina? Ngba! ³¹ Yémbw̄, genó eyigé déb̄w̄ó manere mat̄w̄ó wye d̄w̄ó gelú nnó Es̄w̄w̄ achyε enyú unó bi ul̄ome d̄w̄ó upw̄w̄ó ebif̄ó.

Ḡw̄gé me nḡare enyú meti ewé el̄ome epw̄w̄ó mati ako.

13

Gejeé gejeá gepw̄w̄ unó uko

¹ Mb̄w̄gé ébégé nnó me nkágé j̄w̄ó uf̄w̄ó mej̄w̄ó mme meko ne ewé makiénné Es̄w̄w̄, ne nlá mb̄w̄ó gejeé ne b̄w̄ó w̄ó, mmpye lé mej̄w̄ó détú eké kálánká yé eké ubyaubya. ² Yé ebe lé nnó Es̄w̄w̄ achyε me utó mangarege b̄w̄ó mekomej̄w̄ó ayi atane eta wuú, ne yé nkaá unó Es̄w̄w̄ uko chónchó ne ebi úlú bibií, ne yé mfyé lé met̄w̄ó wa ne Es̄w̄w̄ d̄w̄ó ndere

ékágé pye me njóó ne makwe nnó ákwilé malu bwó ájye né mbá yicha, ne nla mbóó gejeé ne bóó wó, mpó yé genó. ³ Ne yé nkpa lé unó bi me nwyaaá uko nkáre mbaá ubya bó ne yé nchye ntó lé geme ya mbaá bóó nnó ásó né mewe gétúgé depóre Eṣṣṣṣ, ne nla mbóó gejeé ne bóó wó mbóó yé nsa fṣ.

⁴ Muú ayi abóó gejeé ne bóó ágbárege metóó, ne apye galógáló ne bóó ammye fṣ demboó, apó fṣ ne nepa, ne abwegé fṣ mmye. ⁵ Apyeé fṣ neṣa. Apye fṣ genó eyi gepoge lé jimbií, asóó fṣ metóó wáwá, ábélégé fṣ depó debodebo né metóó. ⁶ Gefógé muú yina, abeé fṣ ne nechóchó gébégé bóó aké apyeé gabo. Abee ne nechóchó gébégé bóó aké apyeé genó eyi gelú cho wáwá. ⁷ Muú ayi abóó gejeé ne bóó, abyaá depó debodebo deko etiré bóó ápyeé, akamege nnó bóó apye nye galógáló, anerege metóó nnó ebwó akwórége nye gepógé bwó ne akoge metóó né unó bi ebwó apye yéndégébé.

⁸ Muú ayi abóó gejeé ne bóó, agboó ne ebwó yéndégébé. Gébé gechwó nye eyigé uto ebi bóó agárege genó eyigé getane mbaá Mendoó Eṣṣṣṣ ubyeé, uto bi bóó ajógé ufóó mejóó ebi alá kágé ubyeé, uto bi bóó akage unó Eṣṣṣṣ uko ubyeé nye. ⁹ Néndé unó bi esé dékaá, dékaá déneré wó, ne mekomejóó Eṣṣṣṣ ayi dégárege, dégarege fṣ ji déneré, ¹⁰ yémbṣ, gébé gékwónene nye eyigé Eṣṣṣṣ apye nye esé dékaá unó bina uko. Ne unó bi déla dékaá denere wó, ubyeé nye.

¹¹ Gébégé me nlú mamane, njógé mejóó eké mamane kóó, nferege depó eké mamane kóó ne mpyeé unó eké mamane kóó. Ne nana ayi nlé mmye muú, nlyaaá depóre dembane. ¹² Eṣé dégene unó nana mmye bomebome eké muú ayi apele unó né efeé ewé elá egenege cháñéné. Yémbṣ gébé gechwó nye eyigé esé détuúge ame dégene unó uko cháñéné. Nana me nkaaá fṣ unó uko nnere wó,

yémbō gébé gebéé nye eyigé nkágé unó uko kpa, wye ndere Eṣṓwō akaá me.

¹³ Mankwya mejóó ewé na alu nnó, unó úlú uléé ebi ula ubyéé te kwyakwya. Unó bina élé metóó mamfye ne Eṣṓwō, manéré metóó ne Jíí ne mambō gejeé. Yémbō genó eyi gejeá né unó bina uléé élé gejeé.

14

Echye ewé Mendoó Ukpea echyeye

¹ Mmyege mambō gejeé ne ate, ne mamkpane ntó gechyéé nnó debō echye ewé Mendoó Ukpea echyeye cháchá echyéé ewé epye muú agarege genó eyigé getane mbaá Mendoó Eṣṓwō. ² Néndé muú ayi ajógé mejóó ewé ji álá kágé, ajógé lé ne Eṣṓwō ajógé f́ ne akwaá, yé muú f́ ákágé yé genó eyigé ji ajógé, néndé ajógé lé unó Eṣṓwō ebi úlú bibíí ndere Mendoó Ukpea echyeye ji eshyéé. ³ Ne yéndémuú ayi agarege mekomejóó ayi atanege mbaá Mendoó Eṣṓwō, ajógé genó eyigé akwaá áwú, ne mejóó wuú épóge b́ó éfyéé ebẃó eshye ne ekwenege ebẃó matóó. ⁴ Muú ayi ajógé mejóó ewé ji álá kágé, apógé lé gеме jíí, ne muú ayi agarege mekomejóó ayi atane mbaá Eṣṓwō apógé echomele b́ó Kras.

⁵ Ebo elóme nnó enyú ako déj́ógé mejóó uf́ó uf́ó ewé délá dékágé, yémbō menkelege nnó enyú dégáragé lé mekomejóó ayi atane mbaá Mendoó Eṣṓwō. Muú ayi agarege mekomejóó ayi atane mbaá Mendoó Eṣṓwō aṣ́ea gеме apẃó ayi ajógé uf́ó mejóó ebi ji álá ákágé. Ekosé nnó muú abege ayi agarege ulaá mejóó ewémbō nnó apogé b́ó echomele Jisṣ. ⁶ Aṣ́me ba, mb́ogé me nchwóge mb́o mantame enyú, ne nké nj́ogé lé uf́ó mejóó ebi nla nkágé, ewémbō épóge mb́o enyú nnó? Yémbō ngarege enyú, unó uke ebi Eṣṓwō alere me, yé ebi ji apye me nkaá, yé

mekomejǎó ayi atane eta wuú, yé ebelé manlere enyú mekomejǎó Eṣṓwṓ ewémbṓ ne elú genó eyi gepogé enyú.

⁷ Wyembṓ ntó ne elú ne unó mabeé nkane embya ne neṅke unó bi ulá upó ne geṅwá. Muú aké afōmege embya, byṓgebyṓge yé aké akwele elé neṅke byṓgebyṓge muú apyembṓ nnó ne akaá genó eyigé ji akwele? ⁸ Mbṓntó ne mbá bee alú. Mbṓgé muú afōmege ji byṓgebyṓge, ndé muú akpomege mmye manjye bee? ⁹ Mbṓntó ne elú ne enyú ambṓó. Mbṓgé enyú deké dégarege mekomejǎó né mejǎó ewé délá dékágé ula, epyémbṓ nnó ne bṓó ákaá genó eyigé enyú dejǎgé? Déké dépyeé mbṓ dechṓó gejulé nyú mme detu. ¹⁰ Elú wáwálé nnó ufṓó mejǎó uja fa mme ne yé ewé bṓó ájǎgé élá epó ne ula epó. ¹¹ Yémbṓ, mbṓgé me nkágé fṓ ulaá mejǎó ewé muú ajǎgé muú yimbṓ abeé meṅkeé meṅkeé eta wa ne mentó mbeé meṅkeé meṅkeé eta wuú. ¹² Ndere elúmbṓ, te e mbaá enyú dékpane gechyéé mambṓ echye ewé Mendoó Ukpea echyegeé mmyegeé nnó debṓ elé echye ewé echyegeé enyú uto mampógé echomele bṓó Jisṓs ewené.

¹³ Gétú eyigémbṓ, muú aké ajǎgé gefṓgé mejǎó ewé ji álá ákágé ula, anemmye mbaá Eṣṓwṓ nnó achyeé ji echyeé ewé echyegeé ji uto mangáre ulaá gefṓgé mejǎó ewémbṓ. ¹⁴ Néndé, mbṓgé me nke nnemmye né ufṓó mejǎó ebi nla nkágé ula, nnene chónchó ne mendoó wá. Yémbṓ né metṓó wa nkágé yé genó eyigé me njǎgé. ¹⁵ Ndere elúmbṓ, mempye mbṓ nnó? Nane mpyeé, menene nye mmye ne mejǎó ewé me nla nkágé ula yémbṓ nnene ntó mmye ne mejǎó ewé menkágé. Nkwane makwa né mejǎó ewé menla nkágé ula nkwane ntó ne mejǎó ewé nkágé. ¹⁶ Ne mbṓgé muú aké anemmye choncho ne mendoó wuú afege Eṣṓwṓ né mejǎó ewé ji álá kágé ula, epyembṓ nnó ne muú ayi álá kágé depṓré Eṣṓwṓ akame aké, “Amen” te mbaá ji álá wuú fṓ geno eyigé ajǎge. ¹⁷ Ékágé be nnó wó

otamege Ἐσωω cháηéné yémbō epogé fō muú yifō cháchá.

¹⁸ Ntamege Ἐσωω nnó membōó njógé mejōó ewé nla nkágé mpwōó enyú ako. ¹⁹ Yémbō mbege né mmu echomele bōó Jisōs, nkelége nnó njōó lé uchu uta ebí bōó ákágé ne nnó njógé uchu delé ufya ebí bōó álá ákágé ula.

²⁰ Ἀημε ba, déferege sé unó eké ambane. Bege kenékéné eké ambane abi álá kágé pye gabo, ne ferege unó eké bōó abi ábené. ²¹ Asa né mmu ηwe Ἐσωω nnó Ἐσωω aké, “Nsele nye bōó malo ayicha abi ájōógé ufōó mejōó ebichá, njōó mejōó ne bōó ba. Yémbō bōó ba áwuú fō genó eyigé me njógé ne ebwó.”

²² Ndere elúmbō, manjógé menjōó ewé muú álá kágé ula, alú elé gepō eyigé Ἐσωω alerege utoó bií mbaá bōó abi álá lu dafyéé metōó ne Jisōs Kras épō fō abi áfyéé metōó ne ji. Mangarége mekomejōó ayi atanege mbaá Ἐσωω, alú lé gepō eyigé Ἐσωω alerege utoó bi mbaá bōó abi áfyéé metōó ne Kras Jisōs épō fō mbaá abi álá fyéé metōó ne ji wó.

²³ Ndere elúmbō, mbōgé echomele bōó Kras achwōgé mbaá ama, yéndémuú aké ajógé elé mejōó ewé muú álá ákágé, ne muú ayi álá ákágé depōré Ἐσωω, yé ebelé muú ayi álá afyéé metōó ne Ἐσωω wō achwōgé eféé, ajógé fō nnó enyú ako delú bōó ubwōó? ²⁴ Yémbō, yéndémuú nyú aké agarége mekomejōó ayi atane mbaá Ἐσωω, ne muú ayi álá ákágé fō depōre Ἐσωω yé ayi álá áfyéé metōó ne Ἐσωω wō achwōge eféé gébé eyigémbō, jimbōó ákágé cháηéné nno ji alú pye gabo né mbaá unó uko ebi jimbōó awuú enyú déjógé. Ne unó bi ji awuú upye nye ji akaá nnó akpene nye né unōó mpa Ἐσωω. ²⁵ Mekomejōó Ἐσωω ápye nye yéndégenó eyigé gelu bibíí né metōó wuú gelá gbōgōnō. Epyegembō ji atome nye mano mme anógé Ἐσωω ajōge aké, “Elú wáwálé nnó Ἐσωω alú metōó metōó nyú.”

Echomele bōó Kras énógé Ἐσωω né meti melóméló

²⁶ Αημε βα, mechw ewéna elúmbw nnó? Elú nnó dechwogé chónchó né echomele bós Kras yéndemuú akpome mmye mampye genó eyigé Esōwō achye ji utó nnó apye. Muú ayi akágé ekwō mankwaa ákwaá, ayi akágé manlere bós mekomejós Esōwō álere. Ne ayi akaá genó eyigé Mendoó Esōwō eléré ji né ame gejya agaré. Muú ayi akaá manjós mejós ewé ji álá kaágé ajós, ne ayi akaá mangaré ula mejós ewémbw agare. Pyegé unó bina uko manpoógé echomele bós Kras. ²⁷ Enyú déchwogé né echomele bós Kras, déké ájógé mejós ewé muú álá kágé ula, déjógé fō bós ako, bós apea yé aléé ne ákáge jós. Ne elō nnó muú ama ajógé ne nte ayi fō ajós. Ne gébégé aké ajógé, muú yifo ntó agarege ulaá mejós ewémbw nnó bós ako ákage genó eyigé ji ajósagé. ²⁸ Ne mbogé muú apó ayi agarege ulaá mejós ewémbw, bós abi ájogé mejós ewéna ákwene bōmbw né echomele bós Kras. Ájogé lé mejós ewémbw né metós bwó ne mbaá Esōwō. ²⁹ Yé bós ekpávé Esōwō, áké ágarege genó eyigé mekomejós ayi atane mbaá Mendoó Esōwō, elōme nnó bós apea yé aléé ne ágarege. Ne áké ágarege bós abifo áfwórege genó eyigé ebwó ágarege manchere mbogé nnó getane mbaá Mendoó Esōwō. ³⁰ Yémbw mbogé muú aké agarégé genó eyigé Mendoó Esōwō élere ji ne Esōwō amágé lere genó eyigé fō mbaá nte meηme, ayi alu téné achyεé gébé nnó ayi ajwólé ka ajós. ³¹ Néndé enyú ako dékágé gare mekomejós ayi átane mbaá Esōwō, nte agarege ne nte agare ne yéndemuú nyú akágé nyé genó eyigé Esōwō agaré enyú ne enyú ako défyéé nye ate eshyé. ³² Kaágé nnó bós ekpávé Esōwō awyaa eshye magbare mmye bwó, ágile tεé gébé gekwanege ne ágare genó eyi getane mbaá Mendoó Esōwō. ³³ Esōwō achyεé ebwó eshye nnó ápyé mbw néndé ji ákelege fō nnó dédorégé makpo ne ate, yémbw ákelege lé nnó débe neso ne ate.

Wye ndere machomele bɔ́ Kras mako álu, ³⁴ andeé abɔ mambɛ nyameé né echomele bɔ́ Kras, néndé elome fɔ́ nnó ebwɔ́ ábéné mano apwɔ́ ande. Ábó manshule lé mmye bwɔ́ mme áwuú lé depɔ́ wuú ndere ásamé né ebe. ³⁵ Ne mbɔ́gé ebwɔ́ ákelege mankaá genó ágíí anɔ́ bwɔ́ né mmu upú, néndé elú elé mekpo unɔ́ mbaá andeé manjógé mejɔ́ né echomele bɔ́ Kras.

³⁶ Wɔ́, ɔh! Enyú défere nnó mekomejɔ́ Éswɔ́ aló lé ne enyú? Waá wye lé enyú ambií ne déwuú mekomejɔ́ Éswɔ́? ³⁷ Mbɔ́gé muú aférége nnó ji alú muú ekpávɛ Éswɔ́, yé nnó Mendoó Éswɔ́ ne echyeye ji eshye, abɔ mankaá nnó unó bi me nsame mbɔ́ eta nyú, elé Ata Jisɔ́ Jimbɔ́ ne ajɔ́. ³⁸ Ne muú alá áwuú ne genó eyigé menjɔ́ mbɔ́ na wɔ́, Éswɔ́ ntó akaáge wuú fɔ́ genó eyigé ji ajɔ́gé.

³⁹ Aɲme ba, ndere elúmbɔ́, kragé gechyéé mangarege mekomejɔ́ ayi atane mbaá Éswɔ́, ne dégbeye fɔ́ bɔ́ manjɔ́ ufwɔ́ mejɔ́ ebi alá kágé. ⁴⁰ Yémbɔ́ yéndégenó eyigé enyú dépyéé, pyegé geji chájéné, né meti ewé elú cho.

15

Abya melóméló ayi aɲea geme dɔ́ alú nnó Jisɔ́ Kras agbo ne akwilé né negbo

¹ Aɲme ba, gógé mente enyú mecho abya melóméló yi me ngare nya enyú. Abya melóméló yina ne enyú déwuú défyéé matɔ́ wyéé, dégbare ji ne eshyéé. ² Elé gétúgé abya melóméló yina, ne Éswɔ́ aféreye nye enyú né efwyale gabo, mbɔ́gé déké dégbarege ji chájéné. Ela epɔ́ mbɔ́ wɔ́, ebyennó metɔ́ ewé enyú défyé ne Kras enó detú.

³ Unó bi agaré me, ubi ne me ngare enyú, ne menɔ́ genó né unó bina alú nnó Kras agbo gétúgé gabo ayi esé dépyéé wye ndere abɔ asame né mmu ɲwe Éswɔ́ nnó muú ayi Éswɔ́ akwere ji ela gefwa agbo nye. ⁴ Ágbógé aníí ji, ne ndɔ́ eléé ekwónenege akwilé né negbo wye ndere abɔ

asame né mmu ηγε εσωω. ⁵ Akwilégé né negbo, abó mbe alere mmye mbaá Pita, alere ntó mmye mbaá aηgba bií áfyanéápeá. ⁶ Ewyagé ama alere mmye mbaá aηkwole bií gébé gema. Aηkwolé bií bina ája ápwō gelome mesoó usaá uta (500). Gejamé né geluage bwó álu abe τε fina yé elé abifō ntó ágbó me ⁷ Gébé eyigé fō alere ntó mmye mbaá Jemsi ama alere ntó mbaá aηgbá bií ako.

⁸ Me ne nlú kwyakwya muú ayi ji alere mmye eta wuú. Ndere áleré mmye né eta wa mbō, me nlú eké maá ayi ábyené ji mbelepo. * ⁹ Me ηjōó mbō néndé né geluage aηgbá Jisōs me mpō yé muú fō. Nfuú yé muú ayi bōó ákuú me nnó ηgbá Jisōs wó. Néndé nchyeé echomele bōó εσωω εfwyale dōó. ¹⁰ Yémbō gétúgé galógaló ayi εσωω abo áleré me, apyé me nlú gefōgé muú ayi me nlú mbō fina. Ne galógaló yimbō áno mme detú wó néndé mpye utōó mpwōó aηgbá Jisōs abifō ako. Utōó bi mempye mbō, epōfō lé né utó ba, ηgba. Elé gétúgé galógaló wuú ne ji achyege me utó mampyege utōó bina. ¹¹ Ndere elúmbō, yé ebe lé nnó me ne ngare enyú abya melóméló yé elé aηgba Jisōs abifō ne agarege, εfwyale epó né mmu néndé esé ako dégarege lé genó gemaá. Ne genó geji ne enyú défyéé matōó wyéé.

Elú wáwálé nnó εσωω apye nye bōó abi ágboó ákwilé né negbo

¹² Abya melóméló ayi esé dégarege enyú, alú nnó εσωω apye Kras akwilé né negbo. Ne mbōgé esé déké dégarege enyú mbō, ulannó enyú abifō déjōgé nnó bōó abi ágboó ákwilege fō né negbo? ¹³ Mbōgé ebe nnó bōó abi ágboó ákwilege fō né negbo, ebyennó yé Kras ntó akwilé fō né

* ^{15:8} *Elú wáwálé nnó: Né melu ηγε εwéna*, Pōl alerége bōó ákaá nnó, ji apó fō né geluágé aηgbá abi Jisōs abo ajyaá gébégé alú fa mme.

ásame né mmu ηγε Εσωω nnó, “Εσωω afye unó uko né amu jíí.” Ájógé nnó, “Afyε unó uko né amu jíí”, elere gbogonó nnó Εσωω jimboó apófó né geluage “unó uko” ebi ji afyεé né amu Jisws. ²⁸ Gébégé Εσωω afyεge unó uko né amu Kras, Ji Maá Εσωω, afye nye ntó gemé jíí né amu Εσωω muú abo afyεé unó uko né amu jíí nnó Εσωω mbií ne ágbárege gefwa, muú ayicha áβεγέ sé eke Ji.

²⁹ Mbogé boó abi ágboó ákwilége fó né negbo, ula bi áwyage boó manaá Εσωω gétúgé bwó utene nnó? Mbogé boó abi ágboó ákwilége fó né negbo, chacha, abi áwyaá bwó manaá gétúgé bwó áferé nnó? ³⁰ Ne ulannó ne esé défyεé gemége se ne efwyale yéndégébé? ³¹ Aηme ba, me ngéne manoó negbo yéndégébé. Genó eyi gepye menjó mbó elé gempoge eyi nwyaá nnó utó bi mpyεé eta nyú upye enyú décho mmye ne Ata sé Kras Jisws. ³² Gébégé me nlú né gebagé mewaá Efesws boó áchye me gejamégé efwyale. Elú eké me mmye elé ne menya mewaá. Mbogé mferege ndere akwaá áferege, awa nsa ayi mbó né ummye bina alú efó? Ne mbogé boó ákwilége fó né negbo, “Góoge dényεgé, dényúgé ela gachyεé dégbo.”

³³ Dékamege muú fó abwolé enyú. Déchoge gekagé neke ne boó abi áwyaá gepo gebogebo, enyú ntó débεé nye ne gepo gebogebo. † ³⁴ Kerége né défó nyú, dépyεgé sé gabo. Ngembó nnó enyú abifó dékage fó Εσωω cháchá. Menjógé mbó nnó mpye mekpo unó egbaré enyú.

Gefógé menyammye ayi boó abi ákwilége né negbo áβεé ne ji

³⁵ Muú fó ákage gií aké, “Εσωω apyεé mbó boó abi agboó ákwilé né negbo nnó? Ndé gefógé menyammye ayi ebwó ákwilege ne ji?” ³⁶ Muú ayi agige gefoge nkwe yina alú

† 15:33 Ελί wáwálé nnó: Melu ηγε ewena etané né mmu ηγε Isaiah.

gerjkenégé muú. Dékaá f́ nnó ápege mbwe né mme ábó kpe mbe apwane ne achií wó? ³⁷ Genó eyigé muú apene né mme, gebéé cha ne eyi gewene mé. Ékágé be mbeé nchi yélé mbeé mbwe ayicha. ³⁸ Ne Esɔwɔ achyege yéndé mbeé mbwe gekwógé menyammye ndere ji aklege. Ne yéndé mbeé mbwe awya gefógé menyammye wú.

³⁹ Unó bi uwyaá gerjwá ubeé f́ ne gefoge menyammye gemaá. Akwaá áwya gefógé menyammye áwú bwó cha, menya áwú bwó cha, meshuú ewyaá gefoge menyammye awé bwó cha ne dénywɔne déwya gefoge menyammye áwé bwó cha.

⁴⁰ Menyammye unó bi úlú né mfaánebuú álu ufó ufó ne ayi unó bi úlú fa mme alú ntó ufó ufó. Uló unó bi mfaánebuú úlú cha ne uló unó bi fa mme. ⁴¹ Ŋmɛé ewyaá ebi gefoge uló cha, mfaá awya ebi gefógé uló cha, ambe ntó áwyaá eyigé bwó gefógé uló cha ne yéndé membe awya wye ebi gefógé uló cha.

⁴² Mbɔntó ne ebeé ne bó abi Esɔwɔ ápyéé nye bwó ákwilé né negbo. Ánigé muú, menyammye wú apwanegé, ne gébége Esɔwɔ apyegé ji akwilége né negbo menyammye yimbɔ apwanegé sé té kwyakwya. ⁴³ Ánigé ji alɔme sé mampe amɛ wye ne apó f́ ne uto. Yémbɔ, gébége Esɔwɔ apyegé ji akwilégé né negbo abeé melóméló ne uto. ⁴⁴ Ánigé ji ndere genóge mme yina, yémbɔ gébége Esɔwɔ apyegé ji akwilégé né negbo abeé genó eyigé melu ewé Esɔwɔ alu. Mbógé menyammye ayi mme yina alu, ebyennó ayi melu ewé Esɔwɔ ntó alu. ⁴⁵ Elu wye ndere asame né mmu ŋwe Esɔwɔ nnó, “Esɔwɔ akwye Adam muú mbe, achyéé ji gerjwá”; yémbɔ Adam ayi kwyakwya alú Mendoó ewé echyegé gerjwá. Adam yina elé Kras. ⁴⁶ Gefoge menyammye ayi melu Esɔwɔ f́ wó esé débó mbe dewyaá wó, elé ayi mme yina. Ne ayi débe nye ne ji elé ayi melu Esɔwɔ. ⁴⁷ Esɔwɔ akwye Adam muú

mbe ne usóó ne ayi kwyakwya atane né mfaánebuú. †
⁴⁸ Bóó mme meko álú wye eké muú mbe ayi Esòwò akwye
 ne usóó. Wyembò ntó ne bóó abi ájyéé mfaánebuú ábéé
 nye ne menyammye eké ayi muú ayi atané mfaánebuú.
⁴⁹ Nana menyammye sé alú wye eké ayi Adam muú ákwye
 ji ne usóó, ne bíí umaá débéé nye eké Kras muú atane
 mfaánebuú.

⁵⁰ Añme ba, ngarege enyú nnó gefòge menyammye ayi
 esé déwyaá mbò nana ákwane fó mambe né melu ewé
 Esòwò ágbarége gefwa ji wó. Ne genó eyi gegboó gekágé
 nyéé fó geteé genó eyi geláge gboó.

⁵¹ Gógé me ngare enyú genó eyigé enyú délá délú
 dankaa. Esé ako dégboó nye fó, Esòwò akworege nye
 esé ako, achyéé esé menyammye meke. ⁵² Gébégé
 áfomege mbá Esòwò, Esòwò akworege nye esé mbélépó,
 gemesge nnó muú ábyò ame ánéné. Áfomege mbá
 yimbò bóó echomele Esòwò abi ágboó ákwilége nye né
 negbo, ne ebwó ámágé gboó sé. Gébé eyigémbò ne esé
 ako dékworege. ⁵³ Ne menyammye sé ayi áchóge ábó
 mankwore ála ayi álá chòge ne menyammye ayi ágboó ábó
 mankworé ála ayi álá gboó. ⁵⁴ Ne gébégé menyammye se
 yina ayi áchóge, álagé ayi álá chòge fó, ne menyammye sé
 yina ayi ágboó álagé ayi álá ágboó sé: genó eyigé asame né
 mmu ñwe Esòwò gebéé wáwálé ndere asame nnó, “Esòwò
 apwò negbo, utoó negbo ubyéé.”

⁵⁵ “Wóó òh negbo, uto bye ebi òwáne bóó ulé?

Wóó òh negbo uto ebi wò òpye bóó awuú ubalé ulé?”

⁵⁶ Negbo newáne esé gétúgé gabo ayi esé dépyéé. Ne
 élé mabe ayi Esòwò achyéé ne ápyéé esé dékaá genó eyigé
 gabo yimbò alu, ne gabo afwánege esé. ⁵⁷ Yémbò matame

† 15:47 Elú wáwálé nnó: Adam ayi ájógé mbò élé Jisòs.

mabe ne Εσωω muú achyegé esé uto nnó démmye dépwō gabo ne negbo gétúgé défyéé matṵ́ ne Ata Jisṵ́s Kras.

⁵⁸ Ndere elúmbṵ́, aḡme ba ténege ne eshye, dékamege genóge fṵ́ genyíge enyú matṵ́, pyege wye utṵ́ Ata ne matṵ́ nyú mako néndé dékaá nnó utṵ́ bi dépyeé né mabo ata únómé fṵ́ mme detú.

16

Εchyε ewé áchyege mampoó echomele bṵ́ Kras né Jerosale

¹ Góge meshuú enyú meko né mechṵ́ ḡka eyi enyú déchwṵ́ mampoó bṵ́ Εσωω né gebage mewaá Judiya. Me nkelege nnó enyú ntó dépye wye ndere me mbṵ́ ngaré echomele bṵ́ Kras né meló Galasiya nnó apye. ² Yéndé bíí uwyaá, yéndémuú nyú afere ekéke ḡka né eyi ji áwyaá, ákwyeé ábelé chánchá, ékágé gébége menchwṵ́ge ne bṵ́ ammyege manchwṵ́ge unó. ³ Ne gébége menchwṵ́gé nsame nye ḡwe nchyeé ne bṵ́ abi enyú déjyaá nnó ákra echye nyú ájye ne ewú né Jerosale. ⁴ Ne mbṵ́ge elo nnó mentó njeé, ebwṵ́ ákwṵ́le me déjyé ulua.

Pol asṵ́ mala neke

⁵ Ne menké nchwṵ́ gé enyú, nkoḡé né gebagé mewaá Masedonia, néndé mbele uméé ba nnó nkóge kpe ewúmbṵ́ ne nkṵ́ne eta nyú. ⁶ Nchwṵ́ge mbeleḡe nye mboó ndṵ́ ne enyú ndṵ́fṵ́ nshwṵ́ne yina abyéé nye me ewúmbṵ́ nnó enyú dépoó me, njyeé mbaá ayi nkelege manjyeé. ⁷ Nkelege fṵ́ nnó me nchwṵ́ge mangé enyú nkoóge tenétené. Mbelé uméé nnó Ata akamege nchwṵ́ge mbelé mboó ndṵ́ ne enyú.

⁸ Ndere elúmbṵ́, mbeleḡe fa né Efesṵ́s kpaá te gébé eyigé ányéé epaá ewé Pentikos ebáné me. ⁹ Néndé Ata anene me meti fuú nnó mpye gekpekeḡé utṵ́ fana. Yémbṵ́ gejaméḡé bṵ́ mawame amuame mamḡbe me meti.

¹⁰ Mbəgé Timōti achwəge bane enyú, sége ji chájéné ékágé ji abe ne efō né metōó metōó nyú, néndé ji ntó apye utōó Esōwō wye ndere me. ¹¹ Ndere elúmbō, ékágé muú fō abyā ji, pōóge ji ake chájéné, áchwō age me néndé ame aya alú meti mange ji ne aḡme abifō.

¹² Egbe ewé Apolos nkpea ji ndāndō ne ndō nnó ake ne aḡme abifō achwō age enyú, yémbō elú eké ekwane fō ji manchwō nana wó. Agége meti achwōó nye.

Kwyakwya mejóó

¹³ Bége ame mekpo fuú, tenege ne eshye né unó Kras ebi enyú dékame ne ubi. Yéndégenó eyigé enyú dépyeé, fyege wye metōó ne Kras, défōge yé genó, ne tenegege ne eshye. ¹⁴ Ne yéndégeno eyigé dépyeé, bəgé gejeé né mmu matōó nyú.

¹⁵ Ne aḡme ba, dékaá nnó gébége me ngare mekomejōó né Akaya, Stēfanās ne bōó abi alu né gepú jíí ne abōó mbe afyeé metōó ne Kras ne achyeé ntó gemé gebwō geko mampoóge bōó Esōwō. ¹⁶ Ne nchyege enyú majyeé nnó déwúge ne ufōó bōó bina, dépyeé utōó ne ebwō ne yéndémuú ayi apyeé utōó ndere ebwō apyeé.

¹⁷ Metōó egōó mme gétúge Stēfanās ebwō ne Fōtunatos ne Akaikos áchwōó fa. Ebwō ápoó me wye ndere mbəgé enyú débō débē fa dépoge me. ¹⁸ Ebwō áfyē me eshye wye ndere áfyéé enyú ntó eshye. Chyege enógé mbaá ufōó bōó bina.

¹⁹ Machomele bōó Kras ayi álú né gebage mewaá Esya álóó enyú matame. Akwila ne Priska chónchó ne echomele bōó Kras ewé elú né gepúge bwō aké me ntame enyú bōó Ata chájéné. ²⁰ Aḡme bi álú wéna ako álóó enyú matame. Yéndémuú nyú átame nte, atyaá ji.

²¹ Me Pōl ne nsame matame mina ne ebwō wa me mbōó.

²² Mbəgé muú abōó fō gejeé ne Ata Jisōs Kras, ube ube ne ji. Nnēnemye nnó Ata se Jisōs Kras achwō wáwá.

²³ Nnɛnɛmmɯɛ nnó Ata Jis̄s alere ɛnyú galógáló.

²⁴ Me mbáó gejeé ne ɛnyú ako néndé ɛsé ako décho
mmɯɛ ne Kras Jis̄s. Amen.

Ἡμε menomenyέέ meké
New Testament in Denya (CM:anv:Denya)

copyright © 2010 Wycliffe Bible Translators, Inc.

Language: Denya

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Denya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22
